

廣平府志

ル 5
1572
16



AL885
1572
16



重修廣平府志卷四十三

宦績錄上 周至元

周

大戊午趙成侯三年以爲相成侯薨事肅侯肅侯十六
年游大陵出於鹿門大戊午扣馬曰耕事方急一日不
作百日不食肅侯下車謝史記趙世家

周紹史記作紹武靈王使傳王子何趙世家王立紹爲傳曰寡

人始行縣過番吾當子爲子之時踐石以上者皆道子
之孝故寡人問子以璧遺子以酒食而求見子子謁病
而辭人有言子者曰父之孝子君之忠臣也故寡人以

子之知慮爲辨足以道人危足以持難忠可以寫意信
可以遠期詩云服難以勇治亂以知事之計也立傳以
行教少以學義之經也故寡人欲子之胡服以傳王乎
紹曰王失論矣非賤臣所敢任也王曰選子莫若父論
臣莫若君君寡人也紹曰立傳之道六智慮不躁達於
變身行寬惠達於禮威嚴不足以易於位重利不足以
變其心恭於教而不快和於下而不危六者傳之才而
臣無一焉隱中不竭臣之罪也傳命僕官以煩有司吏
之恥也王請更論王曰知此六者所以使子寡人以王
子爲子任欲子厚愛之無所見醜御道之以行義勿令

溺苦於學事君者順其意不逆其志事先者明其高不
倍其孤故有臣可命國之祿也子能行是以事寡人者
畢矣書云去邪勿疑任賢勿貳寡人與子不用人矣遂
賜紹胡服衣冠具帶黃金師比以傳王子也

國策

廉頗趙之良將也惠文王十六年頗爲趙將伐齊大破

之取陽晉

索隱陽晉衛地後屬齊司馬彪郡國志曰今衛國陽晉城是有本作晉陽晉陽在太原非

是趙世家作昔陽昔陽在并州樂平縣東亦非齊地也

拜爲上卿以勇氣聞於諸

侯十九年

表作二十年

秦王使使者告王欲與王爲好會於

西河外澠池王畏秦欲毋行頗與藺相如計曰王不行
示趙弱且怯也王遂行相如從頗送至境與王訣曰王

行度道里會遇之禮畢還不過三十日三十日不還則請立太子爲王以絕秦望王許之遂與秦王會澠池既罷歸國是歲頗東攻齊破其一軍史記本傳二十三年秦攻趙藺離石祁拔趙以公子邵爲質於秦而請內焦黎牛狐之城以易藺離石祁於趙既而背秦不予秦王大怒令衛胡易伐趙攻閼與趙奢將救之魏以銳師居安邑以挾秦秦敗於閼與反攻魏幾頗救幾大敗秦師國策案史記頗本傳居二年廉頗復伐齊幾拔之趙世家作樓昌將攻魏幾不能取十二月廉頗攻幾取之文均與此歧異二十四年頗攻魏之防陵一作安陽拔之孝成王七年秦與趙距長平使頗將攻秦秦數敗趙軍十五年

燕用栗腹之謀曰趙壯者盡於長平其孤未壯舉兵擊

趙趙使頗將大破燕軍於鄲殺栗腹遂圍燕燕割五城

請和乃聽之趙以尉文封頗爲信平君爲假相國史記趙奢

傳十八年延陵鈞率師從頗助魏攻燕趙世家二十一年

頗伐魏之繁陽拔之孝成王卒悼襄王立使樂乘代頗

頗怒攻樂乘乘走頗遂奔魏魏不能信用趙以數困於

秦思復得頗頗亦思復用於趙王使使者視頗尙可用

否頗之仇郭開多與使者金令毀之遂不召楚聞頗在

魏陰使人迎之頗爲楚將無功曰我思用趙人頗卒死

於壽春史記趙奢傳

重刊廣平府志 卷四十三
趙奢趙之田部吏也收租稅而平原君家不肯出趙奢以法治之殺平原君用事者九人平原君怒將殺奢奢因說曰君於趙爲貴公子今縱君家而不奉公則法削法削則國弱國弱則諸侯加兵諸侯加兵是無趙也君安得有此富乎以君之貴奉公如法則上下平上下平則國彊國彊則趙固而君爲貴戚豈輕於天下邪平原君以爲賢言之於王王用之治國賦國賦大平民富而府庫實秦伐韓軍於闕與王召廉頗而問曰可救不對曰道遠險狹難救又召樂乘而問焉樂乘對如廉頗言又召問趙奢奢對曰其道遠險狹譬之猶兩鼠鬪於穴

中將勇者勝王乃令趙奢將救之兵去邯鄲三十里而令軍中曰有以軍事諫者死秦軍軍武安西秦軍鼓譟勒兵武安屋瓦盡振軍中候有一人言急救武安趙奢立斬之堅壁留二十八日不行復益增壘秦間來入趙奢善食而遣之間以報秦將秦將大喜曰夫去國三十里而軍不行乃增壘闕與非趙地也趙奢旣已遣秦間乃卷甲而趨之二日一夜至合善射者去闕與五十里而軍軍壘成秦人聞之悉甲而至軍士許厯請以軍事諫趙奢曰內之許厯曰秦人不意趙師至此其來氣盛將軍必厚集其陣以待之不然必敗趙奢曰請受令許

歷曰請就鈇質之誅趙奢曰胥後合欲戰許歷復請諫
曰先據北山上者勝後至者敗趙奢許諾卽發萬人趨
之秦兵後至爭山不得上趙奢縱兵擊之大破秦軍秦
軍解而走遂解閼與之圍而歸趙惠文王賜奢號爲馬
服君以許歷爲國尉趙奢於是與廉頗藺相如同位

史記

本傳

毛遂平原君門下客秦之圍邯鄲趙使平原君求救合
從於楚約與食客門下有勇力文武備具者二十人偕
得十九人餘無可取者毛遂前自贊於平原君曰遂聞
君將合從於楚約與食客門下二十人偕不外索今少

一人願君卽以遂備員而行矣平原君曰先生處勝之
門下幾年矣遂曰三年於此矣平原君曰夫賢士處世
也譬若錐之處囊中其末立見今先生處勝之門下三
年於此矣左右未有所稱誦勝未有所聞是先生無所
有也毛遂曰臣乃今日請處囊中耳使遂蚤得處囊中
乃穎脫而出非特其末見而已平原君竟與毛遂偕十
九人相與目笑之而未發也毛遂比至楚與十九人論
議十九人皆服平原君與楚合從言其利害日出而言
之日中不決十九人謂毛遂曰先生上毛遂按劍歷階
而上謂平原君曰從之利害兩言而決耳今日出而言

從日中而不決何也楚王謂平原君曰客何爲者也平原君曰是勝之舍人也楚王叱曰胡不下吾乃與而君言汝何爲者也毛遂按劍而前曰王之所以叱遂者以楚國之衆也今十步之內王不得恃楚國之衆也王之命懸於遂手吾君在前叱者何也且遂聞湯以七十里之地王天下文王以百里之壤而臣諸侯豈其士卒衆多哉誠能據其勢而奮其威今楚地方五千里持戟百萬此霸王之資也以楚之強天下弗能當白起小豎子耳率數萬之衆與師以與楚戰一戰而舉鄢郢再戰而燒夷陵三戰而辱王之先人此百世之怨而趙之所羞

而王弗知惡焉合從者爲楚非爲趙也吾君在前叱者何也楚王曰唯唯誠若先生之言謹奉社稷以從毛遂曰從定乎楚王曰定矣毛遂謂楚王之左右曰取雞狗馬之血來毛遂奉銅盤而跪進之楚王曰王當歃血而定從次者吾君次者遂遂定從於殿上遂左手持盤血而右手招十九人曰公相與歃此血於堂下公等錄錄所謂因人成事者也平原君已定從而歸歸至於趙曰勝不敢復相士勝相士多者千人寡者百數自以爲不失天下之士今乃於毛先生而失之也毛先生一至楚而使趙重於九鼎大呂毛先生以三寸之舌彊於百萬

之師勝不敢復相士遂以爲上客

史記平原君傳

李牧趙之良將也常居代雁門備匈奴謹烽火多間諜厚遇戰士十餘歲匈奴不敢近趙邊城趙悼襄王元年

史記世家作二年

廉頗既亡入魏趙使李牧攻燕拔武遂方城

居二年龐煖破燕軍殺劇辛後七年秦破趙殺扈輒於武遂城斬首十萬趙乃以李牧爲大將軍擊秦軍於宜安大破秦軍走秦將桓齮封李牧爲武安君居三年秦攻番吾李牧擊破秦軍南距韓魏趙王遷七年秦使王翦攻趙趙使李牧司馬尚禦之秦多與趙王寵臣郭開金爲反間言李牧司馬尚欲反趙王乃使趙葱及齊將

顏聚代李牧李牧不受命趙使人微捕得李牧斬之後

三月王翦因急擊趙大破殺趙葱虜趙王遷遂滅趙

史記

本傳

觸龍

一作觸讐

趙孝成王時人官左師秦攻趙趙王新立

通鑑

輯覽

太后用事求救於齊齊曰必以長安君爲質兵乃出

太后不肯大臣彊諫太后明謂左右有復言令長安君爲質者老婦必唾其面左師觸龍願見太后太后盛氣而揖之入徐趨至而自謝曰老臣病足曾不能疾走不得見久矣竊自恕而恐太后玉體之有所郤也故願望見太后太后曰老婦恃輦而行曰日食飲得毋衰乎曰

侍鬻

一本去鬻字

耳太后之色少解左師曰賤息舒祺最少

不肖而臣衰竊愛憐之願令得補黑衣之數以衛王官

一作宮

太后曰諾年幾何矣對曰十五歲矣雖少願及未

填溝壑而託之太后曰丈夫亦愛憐少子乎對曰甚於婦人太后笑曰婦人異甚對曰老臣竊以爲媼之愛燕后賢於長安君曰君過矣不若長安君之甚左師曰父母之愛子則爲之計深遠媼之送燕后也持其踵爲之泣念悲其遠也亦哀之矣已行非弗思也祭祀必祝之祝曰必勿使反豈非計久長有子孫相繼爲王也哉太后曰然左師曰今三世以前至於趙趙主之子孫侯者

其繼有在者乎曰無有曰此其近者禍及身遠者及其子孫豈人主之子孫則必不善哉位尊而無功奉厚而無勞而挾重器多也今媼尊長安君之位而封之以膏腴之地多予之重器而不及今令有功於國一旦山陵崩長安君何以自託於趙老臣以媼爲長安君計短也故以爲其愛不若燕后太后曰諾恣君之所使之於是爲長安君約車百乘質於齊齊兵乃出

國策

虞卿游說士也躡蹻擔簦說孝成王一見賜黃金百鎰

白璧一雙再見爲趙上卿故號爲虞卿

史記本傳

秦攻趙於

長平大破之引兵而歸使人索六城於趙而講趙計未

定樓緩一作樓昌新從秦來趙王與樓緩計之樓緩曰今臣

新從秦來言勿與則非計言與之則恐王以臣之為秦

也故不敢對使臣得為王計之不如予之王曰諾虞卿

聞之入見王曰秦之攻趙也倦而歸乎王以其力尚能

進愛王而不攻乎王曰秦之攻我也不遺餘力矣必以

倦而歸也虞卿曰秦以其力攻其所不能取倦而歸王

又以其力之所不能取以資之是助秦自攻也來年秦

復攻王王無救矣不如無媾秦雖善攻不能取六城趙

雖不能守而不至失六城秦倦而歸兵必罷我以五史記

作六城收天下以攻罷秦是我失之於天下而取償於秦

也吾國尚利孰與坐而割地自弱以彊秦王必勿予非

固勿予而已也秦索六城於王王以五史記五城賂齊

齊秦之深讐也得王五城并力而西擊秦也齊之聽王

不待辭之畢也是王失於齊而取償於秦一舉結三國

之親而與秦易道也趙王曰善因發虞卿東見齊王與

之謀秦虞卿未反秦使者已在趙矣樓緩聞之逃去策國

趙於是封虞卿以一城既以魏齊之故卒去趙困於梁

乃著書曰虞氏春秋史記本傳

漢

田叔趙陘城人趙王張敖以為郎中數歲切直廉平趙

王賢之未及遷會趙午貫高等謀弑上事發覺漢下詔捕趙王及羣臣有敢隨王者罪三族惟田叔孟舒等十餘人赭衣自髡鉗隨王至長安趙王敖事白得出乃進田叔等十餘人上召見與語漢廷臣無能出其右者上說盡拜爲郡守諸侯相叔爲漢中守

史記參漢書本紀

周昌沛人爲御史大夫敢直言戚姬子如意爲趙王年十歲而戚夫人與呂后有隙高祖私憂之徙昌爲趙相高祖崩太后使使召趙王使者三反周昌謂使者曰高帝屬臣趙王王年少竊聞太后怨戚夫人欲召趙王并誅之臣不敢遣王王且亦疾不能奉詔太后怒迺使使

詔趙相昌旣被徵太后使使召趙王王來至長安月餘見殺昌謝病不朝見

漢書本傳

王溫舒陽陵人武帝時遷廣平都尉擇郡中豪敢往吏十餘人爲爪牙皆把其陰重罪而縱使督盜賊快其意所欲得此人雖有百罪弗法卽有避回夷之亦滅宗以故齊趙之郊盜不敢近廣平廣平聲爲道不拾遺上聞

遷爲河內太守

漢書本傳

何武字君公鄆縣人成帝時

縣志作宣帝時誤

爲清河太守數

歲坐郡中被災害什四以上免武爲人仁厚好進士獎稱人善其爲刺史二千石有罪應時舉奏其餘賢與不

肖敬之如一世以此多焉然疾朋黨問文吏必於儒者
問儒者必於文吏以相參檢欲除吏先爲科例以防請
託其所居亦無赫赫名去後常見思云

漢書本傳

馮遂字子產上黨潞人成帝時遷清河都尉上言河隄
方略謂郡丞河下流城郭所居尤卑下土壤輕脆易傷
頃所以闕無大害者以屯氏河通兩川分流也今屯氏
河塞獨一川兼受數河之任雖高增隄防終不能泄如
有霖雨旬日不霽必盈溢屯氏河新絕未久宜可復浚
以助大河泄洪水備非常奏入不行後果決灌郡縣壞
官亭室廬且四萬所

漢書馮奉世傳參溝洫志

班穉扶風安陵人方直自守哀帝中遷廣平相

後漢書班彪傳

作廣平太守

王莽秉政方欲文致太平使使者分行風俗采

頌聲而穉獨無所上大司空甄豐劾之穉上書謝罪願

歸相印入補延陵園郎

前漢書敘傳

魯丕字叔陵扶風平陵人章帝元和元年遷拜趙相門
生就學者常百餘人關東號之曰五經復興魯叔陵趙
王商嘗欲避疾便時移住學官丕止不聽王乃上疏自
言詔書下丕奏曰臣聞禮諸侯薨於路寢大夫卒於
嫡室死生有命未有逃避之典也學官傳五帝之道修
先王禮樂教化之處王欲廢塞以廣游譙事不可聽詔

從不言王以此憚之其後帝巡狩之趙特被引見難問
經傳厚加賞賜在職六年嘉瑞屢降吏人重之永元二
年遷東郡太守

後漢書
魯恭傳

尹勳字伯元河南鞏人家世衣冠勳獨持清操不以地
勢尚人順帝時舉孝廉三遷邯鄲令政有異績後舉高
第五遷尚書令

後漢書
本傳

韋義字季節京兆杜陵人順帝時辟爲甘陵令政甚有
績官曹無事牢獄空虛上書順帝陳宜依古典考功黜
陟徵集名儒大定其制又譏切左右貶刺竇氏言旣無
感而久抑不遷以兄喪去官比辟公府不就及卒縣民

爲義舉哀若喪考妣

後漢書
韋彪傳

劉虞字伯安東海郟人靈帝中平初拜甘陵相綏撫荒
餘以蔬儉率下遷宗正後叛兵攻破清河朝廷以虞威

信素著恩積北方復拜幽州牧

後漢書本傳
案三國志注劉虞東海恭王之

後也以孝廉爲郎累遷至幽州刺史轉甘陵相甚得東
土戎狄之心後以疾歸家會甘陵復亂吏民思虞治行
復以爲甘陵相甘陵大治徵拜尚書令光祿勳以公族
有禮更爲宗正據此爲宗正在甘陵復亂之後與後漢
異書

涼茂字伯方山陽昌邑人少好學議論常據經典以處

是非獻帝時遷爲甘陵相所在有績

三國志
本傳

鮑勛字叔業泰山平陽人建安二十二年出爲魏郡西

重刊廣平府志 卷四十三
部都尉太子郭夫人弟爲曲周縣吏斷盜官布法應棄市太子數手書爲之請罪勛不敢擅縱具列上太子恚甚會郡界休兵有失期者密勅中尉奏免勛官久之拜侍御史

同上

陳矯字季弼廣陵東陽人獻帝末除魏郡西部都尉曲周民父病以牛禱縣結正棄市矯曰此孝子也表赦之

同上

三國

盧毓字子家涿郡人以學行見稱文帝踐阼累遷廣平太守所在有惠化位至司空

三國志本傳

司馬芝字子華河內溫人太祖平荊州以芝爲管長後遷廣平令將軍劉勳貴寵驕豪又芝故郡將賓客子弟在界數犯法勳與芝書多所屬託芝不報一皆如法遷大理正歷甘陵沛陽平太守所在有績

同上

鄭袤字林叔滎陽開封人歷散騎常侍邵陵時會廣平太守缺宣帝謂袤曰賢叔大匠垂稱於陽平魏郡百姓蒙惠化且盧子家王子雍繼踵此郡使世不乏賢故復相屈袤在廣平以德化爲先善作條教郡中愛之徵拜侍中百姓戀慕涕泣路隅

晉書本傳

任燠樂安人咸熙中爲清河太守與魏郡太守吳瓘京

兆太守顏斐宏農太守令狐邵濟南相孔父或哀矜折獄或推誠惠愛或治身清白或摘姦發伏咸為良二千

石

三國志
倉慈傳

晉

孟桓武帝初為廣平太守清白有聞賜帛百匹

晉書
本紀

竇允字雅始平人泰始中拜臨水令克己厲俗改修政

事士庶悅服咸歌詠之

晉書
良吏傳

丁紹

南陽王模
傳作丁邵

字叔倫譙國人惠帝永興初

通志作武
帝舊志作

懷帝時皆非今據
南陽王模傳改正

為廣平太守政平訟理道化大行於

時河北騷擾靡有完邑而廣平一郡四境乂安是以皆

悅其法而從其令

晉書
良吏傳

北魏

張恂字洪讓上谷沮陽人皇始中出為廣平太守招集

離散勸課農桑民歸之者千戶於時喪亂之後罕能克

厲惟恂當官清白臨下仁恕其治為當時第一太宗即

位賜帛三百匹徵拜大中大夫

魏書
良吏傳

楊懿恒農華陰人延興末為廣平太守有治

原史
作稱績高

祖南巡吏人頌之加甯遠將軍賜帛三百匹

魏書
楊播傳

畢聞慰字子安東平須昌人延昌初除清河內史以疾

辭又試守廣平內史在任寬謹百姓愛附

魏書
畢眾敬傳

曹世表字景昇魏郡人延昌中除清河太守治官省約

百姓安之

魏書本傳

楊機字顯略天水冀人熙平中除清河內史有能名累

遷度支尚書

同上

杜纂字榮孫常山九門人明帝初拜清河內史性儉約

尤愛貧老問民疾苦至有對之涕泣者勸督農桑親自

檢視勤者賞以物帛惰者加以罪譴弔死問生甚有恩

紀後除平陽太守清河人房通等頌纂德政乞重臨郡

詔許之

北史本傳

房景伯字長暉東清河繹幕人明帝時除清河太守郡

民劉簡虎曾失禮於景伯聞其臨郡闔家逃亡景伯督

屬縣捕擒之即署其子為西曹掾命諭山賊賊以景伯

不念舊惡一時俱下論者稱之及限滿將代郡民表訴

乞留復加二載

魏書房法壽傳

羊敦字元禮泰山鉅平人永安中轉廣平太守治有能

名姦吏跼蹐秋毫無犯雅性清儉屬歲饑饉家餽未至

使人外尋陂澤採藕根而食朝廷嘉其清白賜穀千斛

絹百匹興和初卒吏民奔哭莫不悲慟

魏書良吏傳

竇瑗字世珍遼西遼陽人天平中除廣宗太守治有清

白之稱廣宗民情凶戾前後累政咸見告訟惟瑗一人

終始全潔聲譽甚美爲吏民所懷及齊獻武王班書州

郡誠約牧守令長稱瑗政績以爲勸厲焉

魏書本傳

趙難南陽宛人爲清河太守有惠政

北齊書趙彥深傳

李詭祖淄川人文帝時宰曲梁決事如神有妖狐作孽

除之值大水壞田廬築防導引以殺水患民獲安堵後

人思其德立廟祀焉

搜神記

辛術字懷哲隴西狄道人武定初出爲清河太守政有

能名授并州長史父老數百人詣闕請立碑頌德

北史辛雄

傳

北齊

裴讓之字士禮河東聞喜人天保

舊志作天平時誤

初除清河

太守至郡未幾姦吏斂迹盜賊清靖有二豪吏亂法讓

之殺之時清河王岳爲司州牧遣部從事案之侍中高

德政舊與讓之不協密奏竟賜死於家

北齊書本傳

邢峙字士峻河間鄭人方正純厚有儒者之風皇建

縣志

作天保誤初除清河太守有惠政民吏愛之以年老謝病歸

卒於家

北齊書本傳

路去病陽平人武平四年擢爲成安令邑在輦轂下舊

號難治重以政亂時難綱維不立功臣內戚請囑百端

去病消息事宜以理抗答勢要之徒雖厮養小人莫不

惲其風格亦不至嫌恨都下有鄴臨漳成安三縣去病

政治獨爲稱首

北齊書兼北史本傳

隋

長孫平字處均河南洛陽人開皇中歷貝州刺史有善

政鄴都俗薄舊號難治前後刺史多不稱職朝廷以平

所在善稱轉相州刺史

隋書本傳

裴肅字神封河東聞喜人開皇中轉貝州長史有能名

仁壽中見皇太子勇蜀王秀僕射高頴俱廢黜遣使上

書上曰裴肅憂我家事此亦至誠也於是徵肅入朝

隋書

本傳

薛孺河東汾陰人清貞孤介不交流俗開皇中爲清陽

令有惠政

隋書薛道衡傳

庾狄士文代人開皇中拜貝州刺史性清苦不受公料

家無餘財其子常噉官廚餅士文杖之步送還京僕隸

無敢出門所買鹽菜必於外境凡有出入皆封署其門

親舊絕迹慶弔不通法令嚴肅道不拾遺

隋書本傳

楊善會字敬仁宏農華陰人煬帝時拜清河郡丞時山

東思亂從盜如市郡縣多陷沒能抗賊者唯善會而已

前後七百餘陣未嘗敗負後追捕張金稱斬之帝賜以

尙方甲稍弓劍進拜清河通守復從太僕楊義臣斬漳

南賊帥高士達又襲臨清賊王安斬之竇建德圍清河
四旬城陷被執建德釋而禮之罵曰老賊何敢擬議國
士恨吾力劣不能擒汝等敢欲更相吏邪遂被害清河
士庶莫不傷痛焉同上

唐

郭孝恪許州陽翟人高祖時歷貝州刺史有能名改左

驍衛將軍唐書本傳

羅士信齊州厯城人高祖時從秦王擊劉黑闥洛水上
得一城命士信守之已入賊悉眾攻方雨雪救軍不得
進城陷黑闥欲用之不屈死唐書忠義傳

崔珏字子玉祁州人舊志誤作平定人貞觀中改授滏陽令仁

民愛物事減刑輕政績之神異傳頌於遠近遷蒲州刺

史卒於官遺命歸葬滏陽磁人思其德立祠祀之王德淵撰

碑記兼姜瀚文事錄

長孫操河南洛陽人敞從弟貞觀中歷洛州刺史有善

政後拜岐州刺史舊唐書外戚傳

裴琰之絳州聞喜人高宗時爲永年令有惠政人吏刊

石頌之舊唐書裴灌傳

尹思貞京兆長安人中宗時以殿中少監檢校洛州刺
史會契丹孫萬榮亂朔方震驚思貞循撫境內獨無擾

武后璽書褒慰

唐書本傳

張知謩蒲州河東人天授中歷洛貝二州刺史性亮直不喜有請託求進無才而冒位者故所莅有威嚴人不

敢犯中宗踐極自貝州追爲左衛將軍

舊唐書本傳

宋璟邢州南和人神龍中檢校貝州刺史時河北水歲大饑武三思使斂封租璟拒不與後累封廣平郡公廣人爲璟立遺愛頌

唐書本傳

韋景駿京兆萬年人神龍中歷肥鄉令縣北瀕漳連年泛溢舊防迫漕渠易壞景駿相地勢益南千步因高築鄣水至隄趾輒去其北燥爲腴田又維艚以梁其上而

廢長橋功少費約後遂爲法河北饑身巡閭里教導撫循民免流散及去邑人立石著其功後爲趙州長史道出肥鄉民喜爭奉酒食迎犒有小兒亦在中景駿曰方兒曹未生吾已去邑非有舊恩何故來對曰耆老爲我言學廬館舍橋鄣皆公所治意公爲古人今幸親見所以來景駿爲留終日

同上

竇懷貞字從一中宗時累仕清河令有治狀後遷揚州

長史

同上

馮元淑相州安陽人武后時爲清漳令右善去惡人稱神明與奴僕日一食馬日一秣所至不挈妻子斥俸餘

以給貧乏或譏其近名元淑曰吾性也不爲苦中宗降璽書慰勞付狀史官

同上

李愷并州汶水人少舉明經高第授成安尉天寶初除清河太守舉美政遷廣陵長史民爲立祠賽祝歲時不

絕

唐書忠義傳

張巡鄧州南陽人元宗時爲清河令治績最而負節義或以困阨歸者傾貲賑護無吝後守睢陽城陷不屈遇害贈揚州大都督至今祠享

唐書本傳

案舊唐書張

授清河令有能名重義尚節氣人以危窘告者必傾財以恤之後守睢陽城陷不屈遇害事蹟頗同惟籍貫歧異姑兩存之

畢炕河南偃師人天寶末爲廣平太守拒安祿山城陷死之賊覆其家時稱二十四郡之忠臣不獨平原常山

也贈尚書諡忠

唐書本傳

張仵德宗時守臨洛田悅攻之乘城固守累月士死糧且盡仵悉召部將立軍門命女出徧拜因曰諸君戰良苦吾無貲爲賞願以此女賣直爲眾士一日費士皆哭曰請死戰會馬燧將兵擊悅城下敗之仵乘勝出戰無不一當百後以功擢至右金吾大將軍

同上

李楚金隴西人授貝州司法參軍

唐書李翱傳

時刺史不悅

於民將去民相率誼譁持瓦石待其出擊之州縣吏不

敢禁楚金奮然曰是何敢爾屬小吏百餘人持兵仗以出立木而署之曰刺史出民有敢觀者殺之木下民間皆驚散去

康熙志

五代

張源德梁末帝時守貝州晉軍塹而圍之是時自河以北山以東六鎮數十州之地皆歸晉獨貝一州圍之踰年不可下源德守既堅而貝人聞晉已盡有河北城中食且盡乃勸源德出降源德不從遂見殺貝人出降晉軍圍而盡殺之

五代史本傳

李承約字德儉薊州人唐武皇時領貝州刺史遷沼州

莊宗卽位授檢校司空磁州刺史爲治平直移授潁州

團練使

舊五代史本傳

張萬進唐初爲沼州刺史有廉吏名明宗下詔書褒之

以諷天下

五代史晉本紀

吳巒字寶川鄆州盧縣人晉出帝時權守貝州善撫士卒會天大寒裂其帷幄以衣士卒士卒皆愛之開運初契丹南寇圍貝州巒命牙將邵珂守南門契丹四面急攻巒從城上投薪草焚其梯衝殆盡而珂自南門引契丹入巒守東門方戰左右報珂反巒顧城中已亂卽投井死

五代史本傳

李穀字惟珍潁州汝陰人晉開運初出爲磁州刺史時契丹入汴少帝蒙塵而北舊臣無敢候謁者穀獨拜迎於路君臣相對泣下穀曰臣無狀負陛下因傾囊以獻會契丹主發使至州穀擒斬之

宋史本傳

郭進深州博野人漢少帝時累遷磁州刺史周顯德中改洺州團練使有善政郡民詣闕請立碑頌德詔左拾遺鄭起撰文賜之進嘗於城四面植柳壕中種荷芰蒲亂後益繁茂郡民見之有垂涕者曰此郭公所種也宋建隆初遷本州防禦使

宋史本傳

宋

王昭遠冀州阜城人授洺州都部署太宗屢稱其能可備急使端拱初召爲殿前都虞候

宋史王繼升傳

盧之翰字維周祁州人太平興國中通判洺州會契丹入寇之翰募丁壯決漳御河以固城壁虜不能攻遷太常博士吏民詣闕求借留

宋史本傳

寇準字平仲華州下邳人年十九舉進士太宗初出知成安縣每期會賦役未嘗輒出符移惟具鄉里姓名揭縣門百姓莫敢後期累官至中書令贈萊國公謚忠愍

同上

徐興青州人以拳勇隸兵籍太宗時累遷洺州都部署

初議建方田命興董其事後改莫州防禦使

同上

劉福徐州下邳人端拱初出爲洛州防禦使馭下有方

略爲政簡易人甚德之卒贈太傅

同上

安忠河南洛陽人端拱初移知貝州有劇賊十二人久

爲民患忠捕之悉獲召判左金吾

同上

李斌青州人太平興國時歷貝州都監涪化中領洛州

團練使勤於政理人服其清慎轉運使陳緯以狀聞於

朝至道初拜桂州觀察使仍判洛州後徙滄州及代吏

民不忍其去鄰境亦上其善狀詔書褒美之

同上

周審玉

通志誤
玉作至

開封人涪化中知貝州有驍捷卒戍州

者三十七人同謀殺審玉劫庫兵而叛推虞侯趙咸雍

爲首審玉覺之率兵悉擒其黨斬十五級磔咸雍於市

先是咸雍父鏐晉天福中嘗誘契丹屠州城至是五十

年而其子戮舊老猶記其事咸異之

同上

張禹珪字天錫河朔人咸平初知洛州兼兵馬鈐轄頗

勤政治宰相王旦使兗州還言其狀優詔褒之就拜洛

州團練使

宋史張
鐸傳

王德用字元輔趙州人眞宗初出爲洛磁巡檢盜張洪

霸相聚界上吏不能捕德用以羶車載勇士詐爲婦人

飾過邯鄲賊果來邀勇士奮出悉擒之徙督捕陝西東

路盜賊相戒曰此擒張洪霸者皆相率逃去德用狀貌雄毅面黑頸以下白哲人皆異之呼曰黑王相公後封

魯國公

宋史本傳

柴禹錫字元圭大名人咸平中移知貝州是歲契丹兵奄至城下禹錫內嚴備禦寇尋引去

宋史本傳

劉從廣字景元并州人以外戚侍仁宗左右請補外自效出知洺州時漳水溢從廣穿隋故渠以殺水勢洺人便之

宋史劉美傳

李繹字縱之京兆萬年人舉進士仁宗時權知貝州歲旱繹爲酒務市民薪草溢常數餓者皆以樵採自給得

不死官入亦數倍邊民歲輸防城火牛草十餘萬委積久輒腐敗繹奏罷之

宋史李若拙傳

董元亨深州束鹿人仁宗時通判貝州王則據城叛元亨方與州將張得一朝天慶觀夜漏未盡變起倉卒衆莫知所爲元亨促馬馳還坐廳事賊黨環甲露刃排闥而入索軍資庫鑰元亨據按叱曰妖賊乃敢弄兵乎我有死耳鑰不可得也賊遂殺之事聞贈太常少卿錄其子孫三人

宋史忠義傳

王信字公亮太原人慶厯中安撫使明鎬奏爲貝州城下都總管城破賊首王則遁信率兵執則而還餘黨自

焚死召爲都指揮使

宋史本傳

宋守約開封酸棗人以安撫使遷知恩州仁宗諭以亂後撫御之意對曰恩與他郡等耳而爲守者猶以反側待之故人心不自安臣願盡力

同上

劉渙字仲章保塞人仁宗時通判磁州厯知恩州恩承賊蹂踐後渙經理繕葺有敘兵民犯法一切用重典威

令大振

宋史劉文質傳

向傳範字仲模開封人尙書敏中子仁宗時厯知恩州有能稱卒贈昭德軍節度使諡惠節

宋史外戚傳

郭諮字仲謀趙州平棘人舉進士仁宗時攝肥鄉令時

縣田賦不平諮至閉閣數日以千步方田法四出量括

遂得其數除無地之租者四百家正無租之地者百家

收逋賦八十萬流民乃復遷殿中丞

宋史本傳

黃莘莆田人嘉祐中知清河縣與南宮令劉摯信都令

李冲皆以治行聞時稱爲河朔三令

宋史劉摯傳

程珦字伯溫河南人知磁州熙甯間定新法守令皆奉行惟恐後珦獨指其未便

宋史程珦傳

磁經五代蹂躪邑井

邨墟民每午夜越城取水行露是虞珦於城內相度地勢穿井十三眼旋獲甘泉磁民便之磁西多山溢水環城三面每夏秋霖霖河水泛漲山濤助之居民田廬率

爲波臣有珦築長隄亘西南數十里以障之宅隩安處

至今爲利

張氏文徵

李口濮陽人熙甯初被廉察爲肥鄉令時漳水決溢戮力疏導又構闔閭築垣墉於縣郭民獲墾墾學宮傾圮銳意興修創造禮器皆如式以養以教邑民咸受其賜

焉

張萃修學碑記

杜絃字君章濮州甄城人起進士爲永年令歲荒民將他往召諭父老曰令不能使汝必無行若留能使汝無饑皆喜聽命乃給印券使稱貸於大家約歲豐爲督償於是咸得食無徙者明年稔償不愆素神宗聞其材用

爲大理評斷官

宋史杜純傳

曹誘字公善徽宗時歷恩州防禦使性謹密習熟典故

卒諡忠定

宋史外戚傳

趙士晤字公美濮安懿王曾孫從徽宗北遷次洺州欲遁還謀未就而金人圍合士晤走至磁州招集義兵以解洺圍旬日間得勝兵五千人歸附者數萬時洺州守臣王麟欲叛降衆軍民怒殺之推統制韓一爲主士晤夜半薄城下力戰破圍入城治壕塹樹鹿角示以持久勵將士死守飛火礮碎其攻具以計生得其首領敵乃解圍去以功遷權知洺州兼防禦使建炎二年金人再

犯洛糧盡援絕衆不能守乃擁士晤出城由大名赴行

在宋史宗室傳

宗澤字汝霖婺州義烏人登進士第靖康元年知磁州時太原失守官兩河者率託故不行澤曰食祿而避難不可也即日就道磁經敵蹂躪人民逃徙帑廩枵然澤至繕城壁浚隍池治器械募義勇爲固守計會金人破眞定引兵南下直扣磁州澤擐甲登城令壯士以神臂弓射走之開門縱擊斬首數百級所獲羊馬金帛悉以賞軍士康王再使金行至磁澤迎曰肅王一去不反金敵又詭辭以致大王願勿行王遂回相州有詔以澤爲

副元帥從王起兵入援澤與金人十三戰皆捷威名政

績卓然過人北人常尊憚之呼爲宗爺爺宋史本傳

陳淬字君銳莆田人建炎初擢知恩州金之種落王善者擁兵十萬長驅兩河遂襲恩淬與長子仲剛拒戰敗飛刃及淬仲剛以身蔽刃死之明年善復圍陳州淬大

敗善兵宋史忠義傳

金

伯特德哩布原作伯德特裔補奚五王族人天會時同知磁州

事捕獲太行羣盜擒王會孫小十苗清等羣盜遂平天德中爲沼防禦使正隆盜起州縣無兵不能禦沼舊有

河附於城下乃引水注壕中以爲固盜不能近州賴以
安爲政簡靜不積財凡調官行李止車一乘婢僕數人
而已

金史本傳

劉敏行平州人登進士第天會中遷肥鄉令歲大饑盜
賊掠人爲食諸縣老弱入保郡城不敢耕種農事廢畝
畝荒蕪敏行白州借軍士三十護縣民出耕多張旗幟
爲疑兵敏行率軍巡邏日暮則閱民入城由是盜不敢
犯耕稼滋殖

同上

丁緯仁字藏用宛平人登進士第皇統中調磁州軍事
判官是時詔使廉察官吏緯仁以廉攝守事凡租賦與

百姓前爲期率比他邑先申明法禁羣小屏息或走入
他縣以避之

同上

程輝字日新蔚州靈仙人擢進士第皇統中授磁州刺
史有吳僧者殺州人張善友而取其妻輝督捕之命張
母以長錐刺僧與其妻無完膚以死

同上

黃八約字彌大東平須城人世宗時授磁州刺史磁素
多盜旣獲而款伏者審錄官不時至繫者多以杖殺或
死獄中八約惻然曰民雖爲盜而不死於法可乎乃盡
請讞之而後行

同上

賀揚庭字公叟曹州濟陰人登經義進士明昌中除洛

州防禦使時歲歉民饑揚庭諭蓄積之家出所餘以糶之饑者獲濟洛人立石頌德同上

完顏齊穆宗會孫章宗時出爲磁州刺史治以寬簡未嘗留獄郡人以前政有聲如劉徽柔程輝高德裕皆不及也河北提刑司以治狀聞召以齊傳充王金史宗室列傳

顧定遠范陽人大定末爲曲周尉有遺愛在人既去民益不忘定遠亦樂其土俗及其歿也遺囑寓葬於邑東

因家焉

靳子昭修學碑記

高瑒隆州利涉人承安中以詞賦進士知雞澤縣是時文教潛闕瑒首建大成殿兩廡繼修稽古堂齋房崇聖

育材士風由是彬彬焉

董師中修學碑記

呂口大興人舉進士以翰林直學士守廣平

舊志作出爲洛州防

禦使精力於治務先遠大修學訓士勸農恤災均臨洛供

辦郡人咸便之

崔逢辰去思碑記

納蘭伯祿合蘇管洛人任雞澤尉性廉謹爲政勤幹嘗

夜捕不良故遊惰多趨本業沙洛水溢親督夫築隄防

護水不爲災

康熙志

李彥祥慶州人爲肥鄉令修壁禦寇築隄防水有善政

及民

肥鄉志

元

劉容字仲寬中統時

舊志作至元時為廣平路總管民有訟連

年不決者容至立斷之獄訟稱平士民畏服

康熙志

張礎字可用通州人中統時知威州有婦人乘驢過市

者投下官暗赤之奴引鳴鏑射婦人墜地奴匿暗赤家

礎將以其事聞暗赤懼乃出其奴論如法

元史本傳

沙班古燕人大德中為威州達魯花赤政尚嚴肅豪猾

潛迹

康熙志

邢秉仁延祐中為廣平路總管平反冤獄發摘奸伏興

學勸農善政甚多

同上

張居敬字行簡延祐中為廣平路總管浚河以防汎濫

立常平倉以恤孤貧均賦役興學校郡人德之

同上

田郁保定人延祐中知威州下車以來田野闢賦役均

盜賊屏息人思其惠

王思廉去思碑記

王士元恩州人泰定四年進士由棣州判官累遷知磁

州值軍興餽餉需索日繁民不堪命士元力為區畫至

為將士陵辱訶責弗避也

元史本傳

董守思字子得藁城人天歷二年知威州辨明冤獄人

稱其能

康熙志

劉明善大名人至元中知雞澤縣遇事精敏勤於吏治

邑苦水患築長隄於城西發威州匿茶之弊課額立辦

摘伏若神盜賊屏迹同上

苗澤懷孟人至元間爲邯鄲簿政先愛民力革姦弊議裁館傳長夫革每歲稅賦車戶去任日民感之爲立碑同上

劉仁字寬夫順德平鄉人至元間授成安尉和易近民贊令定差銀每以戶之貧富高下爲則無纖毫冒濫以故招還避役民百餘戶時旱蝗有司開倉賑給仁監視照民數甲乙其名斗斛公允秩滿去民攀留不得爲之立碑楊成去思碑記

王伯大房山人進士至正間以參知政事出知威州有

才幹德政創州治興學校百廢具舉訟簡民安劉謙碑記

霍安道平山人至正間任雞澤尹興學校修城垣勸課

農桑百姓謳歌康熙志

李起巖字明舉河陰人至正間爲淦陽主簿書絕私謁三字於門勸民興學有兄弟爭訟起巖曰骨肉乖爭實由政化未孚深自咎責其人慚謝而退磁州志

韓仲文陝西人元末知威州有惠政民懷之威縣志

孟吉平陽人元末任邯鄲簿如京師條陳時政謂邯邑衝疲一切車馬夫役應令武安協濟十之四凡十二事省部皆報可民感之泐諸石邯鄲志

重修廣平府志卷四十四

宦績錄中

明

陸禮浙江進士洪武初令永年時當草創禮建署宇開學校闢土田定經制民咸安居焉

畿輔通志

周敏字敏中繁昌人以儒行舉洪武四年知磁州時干戈初息民氣未靖敏務為休養鄉社多建學擇端良者為之師暇復與諸生講習經史三年之間勃然興化任滿歸老幼號泣送之

舊志

包宗達浙江金華人洪武中知磁州創開五爪渠引水

漑田民至今利之後有柳州梁克家來任清勤果斷吏

民信服

舊志參
磁州志

詹俊字用章當塗人洪武四年被徵授磁州同知到官
書公勤廉謹撫字安化八字揭坐隅以自勵時兵革初
定民復舊業俊勞來安輯之督耕桑興學校明飭教令
舉賢薦能決剔弊蠹民有訴掘地得藏金爲衆所奪者
俊立衆於庭諭以義利衆悉還所奪民懷金謝之俊曰
我不欲衆昧義而趨利乃躬自營利耶民愧而去嘗董
民餽餉潼關天寒道中牛馬多斃餉虧則解所服銀帶
易粟代民輸民歸製帶償之俊曰吾得紓民憂何愛一

帶不受隣縣歲蝗自爲文呼天哀告蝗不入境嘗旱作

歌以自責大雨卽至

分省人
物考

楊浩字大宣荊州人永樂初知廣平府振學作士均賦
役弭不軌有明治廣平稱浩爲最

畿輔
通志

高佑字天錫上海人知廣平府操履清慎一室蕭然晏

如也一日偶令所部市茶邑令密置銀二錠佑啟之笑

曰爾謂我有求耶卻還之後有梁觀來守郡亦以廉能

著稱

畿輔通志
參明一統志

李蘓山陽進士永樂中令清河撫恤貧窮民戴之如父

母擢工部員外郎

畿輔
通志

張致合肥監生宣德中令廣平愛民如子發摘姦伏若神當道三列薦章竟以資格限之輿論舉祀名宦廣平志

閻濟山東濟甯進士宣德中令清河飭法令廣文教姦宄屏息學校振興擢監察御史舊志

安理安化監生宣德中知磁州慈嚴並著軍民畏服修五爪渠以興水利磁州志

高仲仁廬陵人宣德中任磁州訓導博通五經勤誨後學賴以成就者甚多舊志

王穀章邳監生正統中令永年政本愷悌行之以信用知閭里利病興除甚多值頑梗者微曲開諭俾自改民

愛戴之永年志

史善解州監生正統初令邯鄲以邑當衝要疲於送迎申請成安肥鄉廣平三邑協濟偏累自此永息平徭役

薄稅歛修廢舉墜務以恩信結民康熙志案分省人物考善宣德中貢士

授邯鄲令清謹自持甚有惠政邯鄲人立祠祀之永年志文廟碑記作正統今從之

王潤介休進士正統中令威縣時歲凶民多流徙兼瀋陽衛屯軍錯居擾民潤撫綏有方量請移屯別部民獲

安養康熙志

陳善汝陽監生景泰中令永年平恕廉潔不迂不苛勸民務農桑民甚賴之永年志

熊懷豐城人天順中知廣平府搏豪強興水利賑饑荒

治爲畿輔冠比去民爲立祠

大清一統志

尤涪字公厚長洲人景泰癸酉舉人天順中知鉛山縣

調永年雪冤獄以廉慎稱淨慧寺僧戕人惑衆捕置之

法燔其寺後以抗直去官

畿輔通志參舊志

張輝黃縣舉人天順中合清河時多盜輝禁緝甚嚴百

姓賴以相安爲人正直不阿崇尚儉素邑人至今稱之

清河志

李昭貴溪舉人天順中知磁州仁恕愛民莅事果斷

磁州志

秦民悅字崇化舒城人天順丁丑進士成化中由員外

郎遷廣平知府剛毅開敏卓然自立政出公平百廢修

舉檢勘荒田馬地三十

康熙志舊志均作三千頃

餘頃辨冤理滯招

撫流亡昭然在人耳目考政爲郡守第一九載去任民

立祠樹碑以思之

分省人物考案一統志民悅知廣平雪死囚十九人

清牧馬地三十餘

頃招集流亡六千戶考績稱最

李進字時勉曲沃人成化己丑進士由郎中遷廣平知

府其地斥鹵恒苦旱進至特建石閘引河水灌田民利

之

分省人物考案一統志進知廣平遇歲旱修利民

閘灌田數千頃疏渠引流皆有成法康熙志稷山王

衡稱其誠心愛民不干虛譽不事虛文蓋紀實云

王衡稷山人天順進士成化中擢御史出守廣平所至孜孜民瘼剛方有為凡利當興害當除者雖阻以權勢弗少挫竟以被誣歸

分省人物考參職官表

鄭維新番禺舉人成化中令永年性嚴明摘發奸宄每得其情集諸生講學因材施教多所成就

永年志

譚肅字本恭壽張進士成化中令雞澤築城障川力起彫敝值大水親詣鄉勘驗安撫招恤流離嚴捕盜賊有質子女以納糧者肅聞為贖還鄉民以掘地得錢數百貫報縣悉散之代償民債去任民為立碑

雞澤志稿

何琮膠州人成化中令廣平律身清慎聽斷明允而尤

急於勞來安定由是饑民安堵又以城垣頽圯修築一

新

康熙志

王表西平進士

舊志職官作汝陽進士

成化中令廣平政尚寬和愛民如子當道交薦其有卓魯之政召杜之譽

廣平志

劉蕘南昌舉人成化中令成安民頗健訟察其奸頑者懲以法刁風頓息學宮頽敝力新之慕政來者日眾乃立歸市近悅二社以處之又闢小東門以便農作當時

稱循良者必曰劉成安

畿輔通志參舊志

李圓上高監生成化中令威縣持己廉謹待物公平杜私謁革侵漁頗有善政

威縣志

閻縉字廷輔曹州監生成化中令威縣德威並用教養兼施以廉能稱奔父喪僚友追送賻金悉卻不受士林

高之

康熙志
參舊志

張夢輔澄城舉人

舊志職官
作進士

成化中知磁州剛介勤慎

練達有爲政績最著先有顧正者大興進士政務寬恕

民稱慈父

磁州志參
職官表

金源上元進士成化中知磁州完固城池禦賊有方民

咸賴之

磁州志

張瑄如皋人成化中任磁州判嘗開河道以除水患又申請以東北沙灘地糧減三分之一攤於西南民稱均

平

舊志

畢震山陽人成化中任邯鄲縣丞持身廉介服粗茹淡

晏如也職司馬政每年兩次赴京俵馬無一毫取於民

者

同上

牛偉東平州監生成化中任邯鄲縣丞廉潔有才幹勤

於職業掌馬政芻牧有法孳息蕃盛甲於他邑民有餽

遺者力辭不受歷任五載始終不渝卒於官民感德立

祠

康熙志

陳璫莆田舉人成化中任威縣教諭學問醇博教率有

方士多賴以成就陞助教諸生肖像祀之

同上

言芳字時榮鄒平進士宏治初知廣平府性簡抗不畏權貴嘗有行縣者芳供餽疏簡雖見忤不爲動坐是左

遷

畿輔通志

陳欽字諒之系出會稽大父嵩以通天文徵赴南京占籍上元縣成化丁未進士授南京武選主事宏治中出知廣平洞達民隱臨事果決至則風裁蹕厲百廢俱興以時巡行屬縣問民疾苦廉有司賢不肖而勸懲之有望風解任去者郡人號爲陳母

分省人物考參職官表

徐問武進進士宏治中任廣平推官廉明寬恕士民德之仕至兵部侍郎

舊志

王鐸岷州衛進士宏治中令永年嚴明果斷民畏其威凡縣署學宮壇壝館舍興理一新歲值荒旱拊循賑療不遺餘力士民有潛德者極力闡揚所獎拔士多知名

永年志

安仁太康進士宏治中令永年風度凝遠才猷明達清而不刻嚴而不殘興利除害不遺餘力民德之

同上

左經耀州進士宏治中令永年性嚴毅豪民侵人田論如法境內肅然以經術爲治隆重學校與諸生解經論文寒暑不輟成就甚多

同上

汪大章普定衛進士宏治中令曲周資性明敏事至剖

決允當人咸懾服雖奸吏黠書無所容其僞士民稱之

曲周志

錢朝鳳廬江進士宏治中令肥鄉吏治精明修學課士

政聲赫然

舊志參肥鄉志

李幹陽城人宏治中令肥鄉時連遭水患民困輸將幹撫字催科曲盡其道偶以他故去詣府乞留者數千人

康熙志參舊志

邵錦商州舉人宏治中令雞澤時當大疫後紀綱廢弛人心玩愒錦清白自矢法律凜然損益因俗催科不擾值流賊之亂縣境騷動鎮撫捍禦邑得保全

康熙志

顧璘字華玉上元人宏治九年進士授廣平知縣

明史文苑

本傳剖決敏利摘伏嚴明

分省人物考

清名善政爲時所稱官

至吏部尙書

康熙志

孫孟和商河進士宏治中令廣平清介不阿政尙風厲當道交薦其廉能公論允協

廣平志

趙弼太和進士宏治中令邯鄲清白自持政尙慈惠嘗曰守令者民之父母也父母於子一氣相通守令於民一體相關實德不孚惟刑是尙卽父子相夷矣而况於官民乎於人務赤心相與人亦不忍欺之時九邑稱良

吏者以弼爲最

康熙志參舊志

解經體泉人成化庚子舉人宏治中令邯鄲性儉素自奉甚薄朔望謁文廟進諸生講釋經義課試嚴明貧民有累年負租稅者與約次第輸之不刑一人凡徭役躬自簽派輕重適宜政平訟理獄無繫囚

四川通志案畿輔通志經知

邯鄲清介絕俗妻子躬自碓磴一日歸自郡道渴或以瓜獻者經探囊中無錢乃卻瓜飲水

許慶武進進士宏治中令威縣寬而栗勤而廉民畏士

懷陞太原同知

康熙志

林瑱字以圭莆田人成化戊子舉人宏治中任清河縣親藩恣侵民田訟久莫決瑱承檄覆勘還諸民馬政有歲額積弊至五倍不可支瑱爲規畫節縮疏請如舊著

爲例收地舊界僅七百畝奸吏兼併至八百二十頃而仍徵其糧瑱覈實罷其餘稅鄰邑類是者悉罷之縣廨

掘地得金銀歸公帑以興學賑窮秩滿當道交薦遷袁

州通判清河民爲立碑

福建通志參舊志案康熙志云瑱合清河勤恤民隱多興革

民以貧棄耕瑱勸諭蓄牛者爲之代耕奏蠲力役以甦民困除豁馬政以省民財又課生徒擒巨盜斷決冤滯囹圄爲空與福建志大同小異

朱鸞高密舉人宏治中令清河平易近民醇厚篤實人

稱爲長者去之日泣留遮道

清河志

劉昭海州舉人宏治中令清河嚴明果斷人畏其威一

時稱爲廉吏

同上

毛深字文淵夏縣舉人宏治中知磁州屢有異政民蒙

其惠

磁州志

章啟字文亨武功衛進士宏治中知磁州嚴明果斷綽有治才黃龍白道十餘里地多沙壓上疏除其糧修五爪渠以興水利立車騎關以守險要創城樓增重關爲防守計正德間流賊之變賴以保全

舊志

李濬字宗禹祥符人成化辛丑進士拜給事中宏治初鑄一階補肥鄉丞肥鄉小邑去京師差近朝貴往來境上每有所發取守領不能拒違濬至則一切裁之以法其後遂莫敢妄求皆曰無撓彼疆項丞爲也是時左降

官多簡傲不省事濬獨盡心吏職推情與下先教諭而後刑罰民大信愛之一日集數百人走闕下上書言願從明天子乞李丞惠養小民書報聞而以母憂歸

分省人物考

胡甯灤州人宏治中爲磁州判申免沙壓地土以輕民稅分解歲進瓶罈以寬民力時稱爲能吏

舊志

陳文淮莆田舉人宏治中任磁州學正以書經教授常自慎諸生勤怠而勸督之弗以束脩爲利

同上

彭杰字景俊吉水人宏治庚戌進士官廣平知府時劉瑾用事威虐中外畿內郡邑皆歲有所獻杰止具三帕

瑾笑曰是非清苦太守耶飯其使遣之

分省人物考

張潛字用昭華州人宏治丙辰自禮部入對大廷高第正德己巳擢廣平知府廣平附畿內三四年來權奸肆虐民不堪命盜起流劫郡邑不可撲滅多方捍禦郡中賴以無事既乃按行屬邑撫循安輯省其財力均其徭賦黜舞文之吏清久滯之獄申庠序之教興禮讓之俗郡邑熙然稱治

同上

華津字濟之無錫人成化丁未進士擢知廣平府時當兵荒津善經畫凡無益之費不急之務悉罷之又請蠲常賦外民不能供者數事惟學校所須不之省太僕丞

有欲收養馬民免地稅錢十之五者津曰民累於馬者甚矣以若所免猶不紓困如徵其半民何以堪遂以其事白巡撫都御史轉聞於朝悉復其故屬邑邯鄲城每山水秋至輒壞民病修築津曰山水挾西河橫流舍河而他圖雖勞無庸乃改河上流北注之漳水勢既分城乃無墊貴戚并民田於清河徵歛太橫民訴於朝事下之日削其數什九民咸頌德

同上

張羽字伯翔南鄭人宏治乙丑進士正德中守廣平選賢良退貪殘施行條教胥吏舞文者痛繩以法吏卒畏懾莫敢仰視雖隆寒盛暑漏下五鼓必起視事夜分乃

寢訪獲積年民害充發配所餘悉以次徒遣而又和易
近民加惠鰥寡因刻羅氏諭屬文以勵寮屬勸建漳川
書院進多士躬自督課問民疾苦遂建閘通水開田千
畝以資困農奏表趙氏以勵婦節嚴禁縣官阿稱以一
士風置木牌令得自白以達民情收積市利以蘇里甲
當是時旁郡之訟咸願質成廣平視諸旁郡若大府焉
吏有不法者率望風解組去順德囚母與僧通子已壯
不改惡其子之言也乃入井死會當決羽曰母無行負
夫與僧私通顧可殺子絕夫嗣乎囚遂得釋鉅鹿有告
婦奏一要宦暴殺其夫吏受委咸憚莫能決羽乃案而

置諸法要宦懼厚賂朱甯誣奏下獄吏民爭斂錢賄甯
爲羽求解羽曰吾宜失官不敢失志若等愛吾幸無枉
吾志也大理直其誣乃還郡自後民益相信斷獄大省
爲八郡最會調守河間士民泣送之擁輿不能行去後
民有遺思懸像而尸祝之

同上

陳英汲縣舉人正德中令永年平易近民稱長者待士
人有體而馭吏胥以威嚴不少寬假差役至鄉村無敢

橫者

永年志

孫讓陽曲舉人正德中令永年值兵燹之後民多逋負
力請蠲除招徠撫綏竭盡心力鄰邑之民多來就食者

同上

朱槩豐城進士正德中令曲周流賊亂後屯兵去就不
常招徠撫綏民以復業戊寅歲饑請於上賑之倣富弼
救荒法全活者甚衆又修學校築隄防通溝渠廣樹藝
惠政多可紀述三年陞任民追感之爲立去思碑

畿輔通志

志參舊志

銀鏡太原

舊志作忻州

進士正德中令雞澤適薊寇至備禦

有方賊聞風解去在任三年百廢具舉後有丁冠者穎
州歲貢爲政得民去任民思之爲立碑

舊志參雞澤志職官表

龔大有字士謙武進進士正德中授廣平令發摘姦隱

芟剔蠹弊邑有牛羊筋角等稅申請罷去有奸胥把持

官長置之法勸農興學刑清訟簡吏治煥然一新

廣平志

張偉米脂監生正德中令邯鄲廉勤公愼百廢具興城

西沁河歲患衝激導之使別流時薊盜猖獗攻掠城邑

偉增修縣城爲守禦計建樓橋築墩臺不逾月事竣寇

至環攻不克數日解圍去邑賴以甯

畿輔通志參康熙志

許汝進睢州舉人正德中令成安當賊亂後歲歉民饑

勤儉率下謹簿籍禁苞苴興學校撫流亡訟簡盜息

分省

人物考

姜文魁進賢進士正德初令威縣學博行優愛民禮士

不計小過陞評事

康熙志

顧正字守中定遼中衛舉人正德中知磁州值流寇逼城嚴於守禦賊不敢犯王師至餽餉不乏大軍克濟民

賴以安

磁州志

張珂德興舉人正德中知磁州政務寬平軍民仰德振新學校士類稱之

同上

李一甯東莞舉人正德中任雞澤教諭文學蘊藉多所著述性方嚴有桀黠訓迪學士以行檢爲先郡守重其文行檄入漳川書院表率多士

康熙志

高汝行太原進士嘉靖初爲廣平知府有豪猾爲民害

前守不能禁汝行至卽按以法郡城西南有隙地蕪穢不治汝行鑿渠修堰引滏水灌之悉成良田民建祠渠

側祀焉

大清一統志

陳俎字少志封邱進士嘉靖中守廣平自奉如寒儒公堂未嘗設一宴郡舊土城首捐俸易以磚石又城臨洺

鎮規制煥然郡人建祠祀之

畿輔通志參康熙志

翁相字輔卿錢塘人嘉靖戊戌進士南京刑部郎中出守廣平廣平爲畿輔股肱郡若古馮翊扶風故事郡二千石輒得陳兵幟羽葆鼓吹導騎士儀衛甚尊寵相至悉罷去嘗單車行屬邑所爲卑身厚民類此郡故多盜

白晝劫獄殺吏民甚橫相捕得其桀驁者置之法餘悉縱舍旋亦解散河北諸郡饑相不及以檄聞開倉賑濟

全活甚眾

分省人物考

瞿晟黃梅人嘉靖三十二年進士官廣平知府鑿長渠三百里引水為四閘得田數十萬畝有盜掠富人貲晟禱於神從眾中呼盜名誅之一郡皆服卒於官

明史瞿九思傳

參 畿輔通志 案舊志郡境滏陽河建閘始於高汝行惟阜民一閘為晟建亦無所謂長渠二百里者錄以備考

柳希玘盧江進士嘉靖中知廣平府時郡境有巨盜屢捕不獲希玘不動聲色卒使一朝就縛暴水蕩民廬舍

極力拯援請蠲議賑至忤監司意不變又開建閘渠以時蓄洩大啟書院以振人文停無名之征罷不急之務

釐積年之蠹吏畏威而民懷德郡人為建祠立碑

呂時中撰

碑記

章滂富陽舉人嘉靖中任廣平同知政事練達攝肥鄉

篆簡刑罰寬疾苦毫無所私

康熙志

萬廷言南昌進士嘉靖中

永年志作隆慶

任廣平同知潛心性

命之理詮釋太極圖諸書多前人所未發署篆永年尤

多惠政

同上

毛汝麟龍游進士嘉靖中任廣平通判平易近人不立

崖岸攝篆肥鄉恤疾苦均徭役優禮士大夫修振學宮

比去士民遮道攀留

畿輔通志

孫允中宛州進士嘉靖初令永年政理平和訟者片言折服有不事生業者諭以務本力農民無游惰以治績擢去泣留者遮道

同上

郝文祥太原舉人嘉靖中令永年持身清介爲政嚴明不苟媚上官吏畏民懷

永年志

閻文貴堂邑舉人嘉靖中令永年爲政剛毅規畫有法猾吏頑民畏威不敢犯修臨洛鎮城捐俸爲之以累

民

同上

沈銓嘉興舉人嘉靖中令永年吏治通明人不敢欺值學宮傾圯修葺逾於舊規培養諸生多所成就

同上

朱泰鄆縣進士嘉靖中令永年歲旱躬歷四郊問疾苦賑貧乏大水將入城泰拜祝泥濘中忽城樓自崩水勢阻塞取船盜河溺民得濟瘡地之不可稻者復教民種

葦民戴之如父母

畿輔通志

皇甫汭長洲進士嘉靖中令曲周政識大體操守端嚴吏胥帖服官至按察僉事

舊志

呂調羹濮州進士嘉靖中令曲周明爽有氣節鋤奸戢暴敬禮士大夫陞兵部主事

曲周志

張鵬翼虞城進士嘉靖中令曲周資性質實振頽起滯

再勅學宮作興士類政績煥然

同上

方逢時字行之嘉魚人嘉靖二十年進士授曲周令

明史

本傳少年筮仕政務通達簡訟便民雖老吏不如也後以

艱去任官至兵部尙書

康熙志參舊志

案雍正通志作萬厯中令曲周似與少年筮

仕四字不合今遵康熙志仍列入嘉靖朝

李秀樂安歲貢嘉靖中令曲周政尙平易操履不汙民

樂其無擾

曲周志

曹守貞江都進士嘉靖中令曲周英明果決胥吏無所容其欺審編徭役胥協輿情陞饒州知府

王察言朝城進士嘉靖中令曲周歲大祲以嚴鎮之寇盜斂迹

毛孔墀福清進士嘉靖中令曲周性率真自奉清儉凡所規爲一遵古法陞戶部主事人追思之爲立碑

祝乾壽應城進士嘉靖中令曲周推誠御物廉介不阿裁節繁費民霑其德擢御史去民勒石追思之

黃驊餘姚舉人嘉靖中令曲周興學勸農革行戶立義冢具有實績

王友賢甯鄉進士嘉靖中令曲周明察果毅蘊以仁厚句攝催科不用胥役閭里無追呼聲漳洛水溢城危甚

設法堵禦脫民於魚又穿溢水爲渠建宏濟閘以資灌

漑民利賴之擢御史

俱同上

陳府上元進士嘉靖初令肥鄉政尙寬厚以興學勸農爲首務民有兄弟訟者諭之輒感化擢南京御史民流

涕送數百里

畿輔通志

潘鑪六安州人嘉靖中令肥鄉政平訟簡輕刑省費歷

任六年民無指摘

舊志

余炯樂平舉人嘉靖中令肥鄉時漳水汎溢炯相度地勢自張達村至王固村開河四十里洩橫流於滏陽民

免溺立祠祀之

同上

王嘉言常熟進士嘉靖中令肥鄉公以御衆清以持己

未嘗有疾言厲色加於民

肥鄉志

張敏德萬安進士嘉靖中以左遷令肥鄉下車詢民疾苦多方煦育吏有犯法者不少貸暇則勸士課業去後

民立祠學宮

同上

周文定吳江官生嘉靖中令雞澤興廢舉墜重修南北城樓增葺大小學舍後有永城歲貢曹希魯者來任廣

浚池塹增置橋梁皆有善政

雞澤志稿

唐音字希古宜興人

案舊志及江南通志均作武進人

嘉靖戊子鄉薦

就選爲雞澤知縣雞澤固瘠邑又比歲旱歉庚戌之秋

寇犯京畿近邊防者率當倣備差科之擾音均節裁省才贍力勁務在必行其志時朝令議買馬民不願鬻官必威取之音不忍上官督之急請罷職民間爭願出馬半日而馬具肥好更爲他邑冠初巡鹽御史欲爲邑宦劉御史豎牌坊音以民窮財詘姑紓其事御史檄縣逮主吏杖之音遂以病乞歸大府慰諭數四邑巨猾范頂午夜操鐵簡椎陳國卿汙其小妻音處之如律府卻其獄擬以和姦翻案音具揭論其事且請罷斥巡鹽御史惑商言配鹽斤銀於縣歲溢額若干清軍御史覈絕軍產僉民頂軍以實伍音皆以爲不可音在縣孜孜民事

未嘗以文法之緩急上官之意指爲趨舍故往往以此得罪尤盡心於訟獄徵歛民有訟者貯一空匣中訟者至發狀決遣之不旬日事畢其所決遣自杖徒以上當治者治之小事擬招成案而已邑中當審差親集應徭者於庭據其籍而訊其業籍與業不相應則以所收者與所開者互相檢察必核實而後已士大夫自應免外必括其餘業以起役差籍一下百姓受冊者比每年減彊半一邑頌平後以疾卒於官

分省人物考

常世勲涇陽舉人嘉靖末令雞澤秉性嚴明刑清訟簡修城垣興學校放逐姦蠹盜賊屏迹調任定襄去民爲

立碑

雞澤志稿

寇陽榆次進士嘉靖中令廣平操守堅確聽訟數言而曲直立剖修飭學宮規制宏備於民纖毫無所擾又修城東門樓侍御傅公名曰借寇以著其美擢禮部主事

康熙志

劉教字見川廬陵舉人嘉靖中令廣平進諸生講良知之學以誠信感孚人心審編均徭闔邑稱平府良其法頒以爲式人有以數百金賄者麾而咎之擢刑部主事

畿輔通志
參康熙志

陳毅晉江舉人嘉靖中令廣平廉靜寡慾淡泊自守而

繩吏去弊不少寬假舊城秋雨必壞歲派丁夫修築毅

用磚砌女垣諸凡政務因革惟宜百姓便之

廣平志

任環

通志
作寰

字應乾潞安長治人嘉靖甲辰進士令廣平

以儉樸導誨鄉閭民奢侈犯禮必加鞭朴有孝弟力田

者獎勸之三載民皆化焉

分省人物考參
畿輔通志

鄔克忠崑山舉人嘉靖中令廣平忠實惠民持守常法

人無所用其欺爲政三年百姓安輯

廣平志

申溪安陽選貢嘉靖中令廣平甫下車卽問民疾苦毅

然興除邑故有太僕寺庫役歲費不下千金力請罷之
審編稱平決訟不擾於士類尤加厚遷知安州邑人擁

留遮道

畿輔通志
參康熙志

張夢斗漳州舉人嘉靖中令廣平嚴明廉介審編均徭
手自裁定不假吏胥悉當於理爲政三年百姓平康陞
刑部主事

廣平志

趙時吉鳳翔舉人嘉靖初令邯鄲性精敏善聽斷暇卽
責吏讀律學書尤加意學校時進諸生講論諄諄不倦
一時言才吏者莫能及

邯鄲志稿

沈麒咸甯舉人嘉靖中令邯鄲瑰瑋有奇氣臨事優裕
百廢具舉時世宗南巡中貴多需索麒與之抗百姓賴
之

康熙志

董威信陽人嘉靖辛丑進士調令邯鄲性恢宏有幹局
事不便民者力陳於上得請乃已徭政視地肥瘠不以
田多爲準催科常緩以紓民力裁革驛傳浮費鄰餉過
邯者皆令邯民任守護責耗則罪邯民威請以輸者自
守之城多毀設法修築行取御史民立祠置祀田

邯鄲志

嚴清雲南進士嘉靖中令邯鄲年少有風力卻過客之
需索節里甲之繁費尋以遷擢去民思之

同上

向淇沅陵進士嘉靖中令邯鄲政治不事粉飾時值水
旱且蝗疫百計活民修河防以拯溺建書院以造士其
尤卓然者莫如修馬政蓋革二百年蠹民之大害咸以

爲張偉之禦寇董威之修城可同稱焉同上

桂萼字子實安仁人正德六年進士嘉靖初令成安明史

本傳下車詢問風俗知民間無蓄積而尙奢靡乃覈田畝

減供需汰夫役釐弊剔蠹期於便民又闢小學設師儒

立科條以端蒙養每戒民勿輕訟鄰邑有疑獄久不決

者多來質成片語折之兩造具服擢南京刑部主事累

官大學士諡文襄縣人與宋寇準並祀於仰功祠康熙志

章允賢青陽進士嘉靖中合成安程士能釐吏蠹察民

瘼均役以息勞寬征以省供平獄訟清剽寇復逋逃頗

多善政擢禮科給事中民思之爲立祠王相建祠記

萬文彩臨安進士嘉靖中合成安廉正自持雅尙樸素

敝履布袍蔬羹藿食澹如也其修廢舉墜卓有成績環

城植柳數千株人呼曰萬公柳舊志

王鈴黃巖進士嘉靖中合成安性峭潔一介不取居官

不攜妻子培植善良誅鋤豪右姦猾吏無敢有逞其技

者擢南京工部主事同上

方瀾莆田進士嘉靖初令威縣精明風厲人畏服之尋

調繁去威縣志

錢木字汝冲海鹽進士嘉靖初授威縣令廢墜畢舉凡

所創建皆興教勵俗爲經久計威邑有志自木始也時

河北三郡賦役不均父老聞威法良便爭請錢威縣往均受臺檄徧歷旁邑內黃南和尤甚獨留經理三月二邑民並立祠祀之

畿輔通志
參浙江通志

高自卑太原人嘉靖中令威縣政尙嚴明令行禁止修學宮革強橫才幹冠諸邑

舊志

胡容婺源舉人嘉靖中令威縣明察有爲施措得體雖舒徐容與而事悉就理民咸安之

威縣志

水之文鄆縣舉人嘉靖中令威縣寬仁平恕民不爲擾尤加意興學教誨不倦時威庠獲鄉薦者三人咸謂其造就之功

潘忠上海舉人嘉靖中令威縣性沈默寡言笑爲政不事鋪張民得以享安靜之福

王明汲懷慶舉人嘉靖中令威縣剛果敢爲遇事無所規避性嚴明吏民莫敢欺侮

劉易從

舊志作從易

汲縣進士嘉靖末令威縣御下嚴明顰

笑不苟在任末期吏畏民懷

俱同上

張濟黃岡舉人嘉靖初令清河操守清約臨民不擾以公事罣誤父老欲爲白於上適聞內艱棄官去人甚惜之

清河志

索紹靈寶監生嘉靖中令清河時世宗南巡所在苦供

應紹以邑小民貧所費視他邑十省八九然竟以此調

任去民爲立祠

畿輔通志

盧汝翼霑化廕生嘉靖中令清河守官清勤馭民平易

尤加意學校士民德之

清河志

孟仲遴鳳翔舉人嘉靖中令清河政務修舉清稅均役

民甚便之雅意文獻嘗召生儒咨掌故編縣志五卷俾

後事者得所考稽咸多其草創之功焉

同上

劉繹邠州監生嘉靖初知磁州理煩治劇頗能裕如後

有饒陽舉人張學萬安舉人劉峻皆來任均嚴明有威

爲吏民所畏服

磁州志參職官表

劉楷完縣舉人嘉靖中知磁州廉靜溫慎政尙寬平而

事多修舉訟無枉曲雅有循良之譽

磁州志

李文察平和監生嘉靖中以通曉音律薦授太常遷知

磁州心存惠愛政尙寬和教民舉行射禮不愧通雅之

稱

同上

栗永爵長治舉人嘉靖中知磁州修舉廢墜如鑄祭器

興社學築城隄勸農桑以及禱雨輒應皆實政勤民父

老尙能道之

同上

侯廷訓樂清進士嘉靖中以吏部主事謫曲周丞不卑

小官盡心庶務立義倉以備荒創小學以養士尤能得

爲治之本舊志

盧經山西人任肥鄉教諭耿介視躬尤樂與人善諄諄勸諭不率教者面斥之故無敢阿以私先有貴州陳一龍者嘗諭肥日以孝弟忠信爲訓督課多士寒暑不輟士並稱之肥鄉志

許錡甯陽人嘉靖中任邯鄲教諭門無私謁不受餽遺貧士有婚喪輒恤之士有一善欣然獎掖聞有過則規之教人必曰忠信廉恥平居危坐如對大廷造其室几銘牖箴皆格言也及去邑人士思之邯鄲志

胡懋仁臨海人任成安教諭好學誨人寒暑不輟諸生

有婚喪不能舉者捐俸賙之學宮舊無名宦鄉賢二祠申請創建邑令桂萼重其學行師事之康熙志參舊志

古時俊博羅舉人嘉靖中任成安教諭敦崇德意以師道自嚴定章程勤督課崇雅黜浮文體士風翕然一變成邑科甲絡繹其遺澤也舊志參成安志

李應德絳州人以明經任成安教諭著八行集十要規以教士捐俸供饌輸資濟貧士子束脩脯栗皆不受講解經旨評隲文字亶亶數百言聽者豁然心解時稱博物君子同上

施大經長洲人嘉靖中任威縣教諭敷教得體持身有

法嚴約束抑奔競訛傳罷官大經卽日就道及報至乃前任是職者人皆惜之

威縣志

甯元伯衡陽舉人嘉靖初任磁州學正深明易理諸生多執經受業且率人以身士風丕振

磁州志

辛繼先襄城歲貢嘉靖中任成安訓導天資耿介課士修業卓有古風聞母訃卽日就道郡守怒其不辭使追還繼先正色語追者曰母子永訣五內如割何復能俯仰上官况教職非有司比乎卒不返郡守嘉其孝

舊志

朱萬瀛

康熙志作萬鎰

山西人任肥鄉典史推鞠公平不以苞苴易曲直每日官有崇卑民望無二若卑官急私橐竭

民膏是謂盜賊何以官爲後陞任去

肥鄉志

程純光山進士隆慶初令永年清介自持專務德化民胥感服後陞戶部主事去其孫世昌崇禎間知廣平府

舊志參縣志

王嘉言常熟進士隆慶初令曲周質直不事文飾訟簡政明民安吏肅期年百姓便之陞主事

曲周志

李秉衡陳留歲貢隆慶中令曲周治漳泛溢隄防得宜一城賴之咸頌其德

同上

段補蘭州進士隆慶中令曲周慷慨有爲事不便於民者力白去之不爲上官撓屈民害賴之以紓

同上

李栻豐城進士隆慶初合肥鄉設鄉約立保甲置義倉
建社學杜鄆米隄口以防水患積穀萬餘石以備凶荒
捐俸恤貧士絲毫不擾於民民建祠繪像以祀舊志

陳明經光州進士隆慶中合肥鄉案無留牘獄無重囚
盜不入境士樂民安陞任去民爲立祠顏曰廉惠同上

文階舊志作文楷南充進士隆慶中以戶部主事左遷廣平

合才識超逸積牘累訟一時剖判如流爲政持大綱略
小節識者知其非百里才尋陞應天推官百姓戴之廣平志

劉伯生孝感進士隆慶中合廣平體貌清癯弱不勝衣

日親案牘剖決無滯尤加意多士莅任三月陞南京吏
部主事士民泣送數百里不絕先有別叢者夏津舉人
政尙慈祥咸稱古之遺愛廣平志兼採職官表

高世雨原武進士隆慶中合邯鄲精敏嚴毅令出民信
先是徭征不平積爲民害世雨均之又釐剔倉役庫役
等弊調劑逃戶荒地之糧善政甚多邯民至今德之邯鄲志

張第荏平進士隆慶末合邯鄲性仁慈敏於任事外不
炫赫赫名而民實受其福如抗鄆米之議減薄地之徵
修祭器以肅祀典表貞節以扶風教邑乘久闕詢訪士

儒旁搜遺佚於萬厯元年勒成一書邑之文獻始有所
徵尤政績之顯著者

舊志參
邯鄲志

孫惟中甯海監生隆慶中由永年丞遷清河令一僕自
隨獨勵苦節卒後檢囊中僅遺錢二百士民爲舉喪甚

哀

畿輔
通志

傅順孫昆明舉人隆慶初任廣平教諭訓誨諸生課以
舉業責以德行傳以經濟三者兼修當道委護縣符剖
疑發滯摘伏推姦若見肝胆委編馬政人人稱平召授

御史

廣平
志

孔學易安邑人任肥鄉訓導修學宮恤貧士不可干以

私又有南宮趙登第者亦任肥訓導課士先德行後文
藝爲所成就者甚衆咸稱頌焉

肥鄉
志

陸僑字安卿登州衛人

舊志作蓬萊歲貢

隆慶初任廣平訓導

天性純慤尤敦廉靜以正己正人希聖希賢爲訓以孝

弟諭俗以鄉約誘蒙建奎樓置學田捐貲賑士程課日

嚴所著寓菴文集初學輯略聲歌正脈家禮易簡編行

世

康熙
志

蔣以忠字子孝常熟人

江南選舉志隆慶戊辰進士

萬厯初知廣平

府廉明仁恕達於政體修學宮興士類開文通渠建潤

民聞歲旱民饑開倉勸賑全活甚衆

畿輔
通志

陳簡屯留進士萬厯中知廣平府振法紀釐奸弊值歲
歉賑貸多方會西甯有警料丁壯修軍械葺城堡用戒
不虞每朔望俾多士執經問難於前拔其尤者合於書
院肄業同上

劉芳譽陳留進士萬厯中以御史知廣平府未及期境
內大治政暇與生徒課藝談經慨然以啟牖後學爲任
遴九序之俊羣居正學書院次甲乙而簡拔焉同上
南居益字思受渭南進士萬厯中知廣平府政以仁厚
爲本甄拔流品作興士類負笈從學者甚衆暇則賦詩
清讌藹然盛世之風舊志

焦源清字湛一三原進士萬厯中知廣平府寬而有度
嚴而不苛於法令不驚變更壹意勞來裁成每謁文廟
輒進諸生訓誡之務軌於正有不克婚葬者時加賑恤
焉同上

徐世登豐城舉人萬厯初任廣平同知和厚廉明時與
諸生講學有儒者風後攝肥鄉篆舊志參肥鄉志

張鳳翔字蓬元堂邑進士萬厯末任廣平推官年少精
敏平反無冤兩攝邑篆皆有政聲厯仕至尙書畿輔通志參

舊志案肥鄉志鳳翔以推官攝篆剔蠹興利號稱神明

周之綱商城進士萬厯末任廣平推官嚴明有守人不

敢干以私攝永年合實心興除民多利賴以卓異擢給

事中

康熙志
參舊志

馬翰如陳留進士萬厯初令永年獄有冤抑必為伸剖

凡經參決無敢再控

雍正通志

時有水患翰如決孟家口洩

之復築堰以障洺水開拓盜陽增稻田數百頃改條鞭

革種馬大戶皆稱惠政

大清一統志

任九年陞都察院經歷

邑人為立祠於午橋堡

永年志

李堯民鄆城進士萬厯中令永年立身嚴正為政精明

決斷如神洞燭民隱勸課農桑興除利弊不遺餘力後

擢御史督學北直所選皇明文選三集士林傳誦焉

永年志

志

耿鳴雷新城進士萬厯中令永年純樸寬厚推誠與人

八年如一日有兄弟相訟者以孝弟諭之輒自感化風

俗由是不變尋擢御史

畿輔通志

案永年志鳴雷

不獲禱於神有羊繞輿行逐之不去聽之至縣治觸槐
屢仆鳴雷檢吏籍有楊懷德訊之即盜銀者又修利民
聞勸課農桑俱有成效後巡視
畿南復為永置學田若干畝

胡行知濰縣進士萬厯中令永年才識充拓遇事敢為

時值編審訪士民稽版籍逃戶詭寄秋毫畢照人無敢

欺者後中蜚語去永人惜之

永年志

陳所行武鄉進士萬厯中令永年以愛養百姓為心推

誠撫物諸務就理捐俸建魁星樓於城東南隅擢工部

主事同上

張振秀臨清進士萬厯中令永年好作養士類凡所獎

拔皆次第獲雋乙卯分校北闈得人最盛敷治明敏有

古循吏風擢吏部主事康熙志 案永年志振秀知肥鄉調永年甚有聲累遷太常少

卿崇禎十五年落職歸大清兵至臨清城破死之

李宜培邲縣進士萬厯中令威縣釐革積弊務在與民

休息又能興賢造士不振人文調永年明敏有決斷訟

者至數言立判人咸服其吏才永年志參威縣志

胡東漸章邱進士萬厯中任廣平府推官攝永年令與

民休息一切額外之征悉為蠲除徵收秋毫無染民德

之尤加意作人多登仕版者厯官至操江巡撫永年志

江中淮歙縣拔貢原作山東監生據康熙志職官表改正萬厯中任廣平

府推官署永年令沈斷有為百廢具舉喜獎拔寒士請

謁路絕人服其公同上

降天衢介休監生萬厯中任廣平府經歷署永年令性

甘淡泊一介不取衙蠹以窩訪恣為奸利天衢擒置之

法一時憚其強項同上

周應中會稽進士萬厯中令曲周愛民若子一介必嚴

任甫三月陞順德同知去百姓遮道攀留涕泣不忍釋

咸以周清天稱之曲周志

馬大儒陽信進士萬厯中令曲周明敏果決片言折獄捐俸金買田數頃收租備賑擢吏部主事民立碑建祠

畿輔通志

王象恆新城進士萬厯中令曲周公清亮直剔蠹剖奸毫髮不稍恕而樂與人爲善刻鄉約書頒布告諭頑民皆向化又建文昌閣以石文立耕餘倉以備賑後丁艱去民建祠尸祝之舊志參縣志

張潑原名自悟樂陵進士萬厯中令曲周初筮仕以未諳官方痛自追悔改署中浮槎閣爲悔過堂仁明廉慎

政聲卓越擢御史民立碑建祠康熙志參舊志

王祚昌合州進士萬厯末令曲周寬裕和靜庭中幾可

張羅而境內以治擢御史民爲建祠曲周志

趙允昌掖縣進士萬厯末令曲周風格嚴重明於吏治叢奸悉剔人不能欺政成擢御史同上

彭應參光山進士萬厯中令肥鄉性抗爽不作崖岸凡應行利害不待申請卽振舉事母尤以孝聞肥鄉志

廉靖鄆陽舉人萬厯中令肥鄉歲大饑移文請賑全活者數萬徵糧不取耗羨令民自收自解胥吏無所假手

畿輔通志

曹司宰宜興舉人萬厯中合肥鄉革稅耗公費數千金
舊例歲買馬解邊司宰以值給民令小戶貼大戶而大
戶自市良馬解罔寺民免苦累又創寒春院以棲貧民
有投暮夜金者卻不受擢刑部主事同上

萬廷搢南昌進士萬厯中合肥鄉清正方嚴崇文重士
復射圃立社學修城隍建義倉於各鄉以備荒善政甚
多擢禮部主事肥鄉志

周汝弼商城進士萬厯中合肥鄉用刑頗峻刻而能辦
事漳水逼隄外汝弼悉心防守城賴以全擢御史官至
巡撫舊志

李永固

原作本固據職官表改正

益都拔貢以通判

原作同知據職官表改正

肥鄉築居官清廉愛民好士值歲旱虔誠步禱雨輒應

仁心善政肥民尸祝不忘

肥鄉志

張受道日照歲貢萬厯中令雞澤果毅有爲公正不阿
修築磚城聽訟明斷以不阿事上官去公論惜之康熙志

白起旦華容舉人萬厯中令雞澤明敏端介爲民興革
權貴莫撓嘗乘驢至田間勸民濬井樹桑先是戶口編
征用三等九則例富影貧差產廢徭存叢害滋甚又倉
斗級賠累每至傾家乃革除當事者丁止徵銀一錢餘
盡攤入地畝斗級召募應役於雜派內徵銀十兩爲修

盤用至今稱便創澤陽書院躬自課士多所成就卒以

不阿權貴去

雞澤志稿

李必達城固舉人萬厯中令雞澤下車首葺文廟訪利病次第興除民有被盜者以一人出首誣衆必達爲辯其冤并獲真盜人稱神明後丁艱去邑人立祠祀之

舊志

張雲翔號柳池上蔡舉人萬厯初令廣平專務德化訂孝經刊誤以示民遵行呂氏鄉約嚴保甲以弭盜有古

循吏風

康熙志參舊志

宋昂號一村咸甯舉人萬厯中令廣平政尙簡惠不事苛察在任四年於百姓無絲毫漁獵疲邑元氣賴以休

養尤加意學校公餘進諸生析經論藝臺臺不勸士民

德之

廣平志

沈子來號明陽歸安進士萬厯中授句容令以不從加賦拂時相意調廣平邑故瘠貧更旱蝗相繼子來徧察疾苦予賑恤全活甚衆豪民王某橫一邑忤者必碎前令多受把持子來將至其黨來探佯慰之旣至下之獄籍其家得假印及諸不法具案致於典遠近稱快在任四年勸農課士簡訟緩賦省徭役固隄防民戴其德擢刑曹累陞廣西都清兵備以病卒訃聞廣平士民千里赴弔舉祀名宦乾隆甲子六世孫世楓分巡大順廣道

勒石爲記

舊志

李廷彥甯夏衛人萬厯初令大名以賢調邯鄲爲政並用寬嚴聽斷而人不欺且品藻甚精士類傾化遺愛旁

洽口碑至今

邯鄲志

蕭察汝陽舉人萬厯中令大名調邯鄲治尙嚴明周悉民隱均糧請賑修學崇文頗多善政士民至今德之同上盧龍雲南海進士萬厯中令邯鄲時邑志經十餘年爲續編以補之又創建三忠祠重修三賢祠崇先哲示後世砥礪風尙政務爲其遠且大者同上

朱光祚江陵進士萬厯中令邯鄲立叢臺講院日引諸

生課習其中抉擇精當多士慰服擢吏部主事厯官總

漕工部侍郎有生祠

同上

歐陽調律合州進士萬厯中令邯鄲有清操耗羨分毫無取尤樂於造士經其指授率多成立沁河泛溢侵城

築石隄障之至今永賴名曰歐隄

畿輔通志參舊志

柏正舒城舉人萬厯中令成安性嚴毅端謹豪強懼服民俗居喪多用妓樂修佛事正力禁之建四門橋勸農桑均徭賦革私稅善政甚多

康熙志參舊志

李琯豐城進士萬厯中令成安邑自九年奉文括田頑民欺隱多端遂至作奸者地浮於糧守法者糧浮於地

害無已時瑄申請丈量不數月除積習之蠹貽永久之

利邑人戴之

蔡可教丈田記

劉永脈延津拔貢萬厯中令成安以興廢起替爲任新學宮置祭器繕城垣建廨宇纂修縣志諸善政皆有實

績可紀

舊志

李三畏字敬甫長山舉人萬厯中令成安下車卽建文廟左右兩坊又置學田義冢築隄防立文社修縣志以年老乞休七上始允所著有公餘漫興

成安志

馬珍代州舉人萬厯末令成安修書院以造士築隄防以護城輕徭薄賦緩征便民市井草莽同心愛慕陞慶

陽同知去民爲立碑

郭佳鎮去思碑記

李魚化厯城舉人萬厯中令威縣才識明敏政體諳練

人不能欺時號神君

威縣志

王鈞濟甯舉人萬厯中令威縣老成持重專務以德化民一時稱爲慈母爲立生祠

史學遷翼城進士萬厯中令威縣承積弊之後銳意振刷尤嚴攘竊之禁雖值荒年狐鼠屏迹良民安堵尋調滑縣邑人爲立碑建祠

何圖江津舉人萬厯中令威縣政尙嚴明與人接言笑一無所苟雖久侍左右莫能揣摩意向故浸潤者不得

行陞六安知州卒於官威人招魂祭之今有祠像存焉
俱同上

王守禮永昌衛貢生萬厯中令清河爲政剛毅留意興除舊時宣大山陝互市貨物所經之地官爲買車遞送前途押赴人役多陵虐需索有守候五六日始交卸者民甚苦之守禮爲悉除前弊邑人稱頌他如賑恤孤貧修官廨設鋪舍善政尤不勝紀

清河志

于從政膠州舉人萬厯中令清河邑舊有溝渠淤淺不治從政力請上官募民修濬自蓮花池以至石家隄口通馬頰古黃河而達海邑民得免水患

畿輔通志

張指南開州舉人萬厯初知磁州治政精明操守堅確去後民思之比於劉楷

磁州志

趙範漳浦進士萬厯中知磁州仁愛寬和革稅役以蘇民困置學田以資寒士磁人德之

孫健餘姚進士萬厯中知磁州創立閘渠以開水利後有顧頤者博興進士亦修閘有功商州舉人牛維赤創闢南渠均爲民利焉

俱同上

劉安仁臨安舉人萬厯中知磁州修城建閘後世永賴民有婚喪不舉者捐俸以助之當時稱循良以安仁爲最

舊志參
磁州志

王仁廣東舉人萬厯中任永年教諭性耿介接人和易士無貧富遇之如一取予之節一毫不苟諸生言行不謹者正言責之援引經義聞者感動每論文藝發明聖賢之道深以浮薄為士子戒學校中至今稱之永年志

劉見曾開州歲貢萬厯中任永年教諭性方介無阿徇察諸生勤惰而賞罰之空乏者力為贍給焉同上

孟汝濬蒲州舉人萬厯中任曲周教諭志節端方矩矱不苟歷官鳳翔知府曲周志

冀蓋臣榆次舉人萬厯中任曲周教諭日進生徒督課之有以束脩餽者卻不受兩典文衡收錄多知名士陞

定興知縣同上

惠承芳清澗舉人萬厯中任曲周教諭捐俸設育士倉積粟為諸生饘粥購備經籍以時省校開學宮西塞巷穿渠藝蓮建亭臨水雒誦其中士習蒸蒸去後建祠櫺星門東隅以祀舊志

龔世仰龍游舉人萬厯初任雞澤教諭秉公不屈有兩生因事被革力為復之厯攝三縣篆具有實績陞望江

知縣雞澤志稿

于遴霸州歲貢萬厯中任雞澤教諭質樸耿介雅有操持時督學左公以歲試例督察諸生劣行者屢檄不應

峻詞索之毅然曰雞士蒙公培植人知自愛遴敢徇例

以不肖誣人傷公德化乎卒無所報遷乾州學正

同上

余登蒲圻舉人萬厯中任廣平教諭博雅好學留心撫

字奉簡書發粟多方賑給賴以生全者甚衆卒於官士

廣平志

民爭出金帛以殮之

胡夢牙普安衛舉人萬厯中任清河教諭倜儻負氣節

教令嚴明聘爲漳川書院山長十學諸生雅服其化嘗

上疏請端士習振士風議論激昂直氣凜凜尋遷司理

康熙志
參舊志

高思讓定州歲貢萬厯中任永年訓導每與士子語必

志

援引古先正法言絕口不及聲利所獎拔士多知名

永年志

吳鳳儀霍山監生萬厯中任曲周訓導平易近人與諸

生講學往復無倦厯九年致仕去人咸思之

曲周志

梁自耕福建歲貢萬厯中任廣平訓導學問宏富遇事

持正不阿士人悅服攝肥鄉篆訟簡刑清與民休息往

來惟一馬一夫屏騶從不用

廣平志參
肥鄉志

段學一鄭州人萬厯中任永年主簿律已極嚴有治事

才爲邑人所稱

永年志

湯以霖宣城人萬厯中任永年典史才識俱優工詩文

與邑人士唱和名利之際泊如也時又有王安民富平人任永年典史清苦刻勵餽遺悉絕邑人重之同上

黃詔南直人以吏員任肥鄉典史理訟不輕答人捕盜不重擾人奉批尤不忍入人罪以媚人每夜焚香自誓陞任去餽饍分毫不受肥鄉志

石秉中祁州監生萬厯中任磁州吏目廉能勤慎上下稱賢陞平陸主簿磁州志

徐廷宗建德進士天啟中任廣平推官性簡樸執法無移康熙志值水患民露處失所廷宗罄囊賑濟不繼作無私禮帶以佐之畿輔通志

蘇守範鄆陵進士天啟中令永年為政嚴明剖決如神去邑中大蠹民賴以安永年志

朱純長清進士天啟中令永年時大水為災親立風雨中築沿村隄障不致滄沒尤好培養人才衡文課士孜孜不倦士民德之同上

駱先覺諸暨進士天啟中令曲周慈仁寬柔為政不尚嚴峻以降調去民咸惜之曲周志

楊時晦沂水舉人天啟初令肥鄉時漳水浸城僑寓井堂寺又移寓郡城已而挽泥入縣誅茅理政題所居為中流堂建漳神祠為民祈禱性灑落能文章不擾民亦

重修廣平府志 卷四 職官表
不媚上居二年託疾去官

肥鄉志

盧芝茂杭州人天啟中以永年主簿攝肥鄉篆與百姓相安徵收耗羨標識存庫以待正令悉付之爲公用

肥鄉志

曹亨忻州人天啟末令肥鄉翦吏蠹革糧長出金令役代民天津納米豆又因寇變製槍礮備弓矢改建磚城未竟丁艱去邑人懷之

同上

曹大章襄陵舉人天啟中令雞澤性方嚴簡易錢糧毫無羨餘各鄉車牛芻豆之類註簿鈐記週而復始無賂脫重累諸弊舉卓異第一以艱去

畿輔通志

王國祚平陸進士天啟中令廣平政尚嚴明百類俱振

後有岐山李樹聲由舉人來任廉明仁信有古循良風

廣平志參職官表

趙振業益都進士天啟中令邯鄲政尚嚴明而樂與推誠人多懷之五載課士始終不倦擢御史歷官江南廬

州兵備道有生祠

邯鄲志

元之偉字超凡萊蕪人天啟壬戌進士授成安令剛正不避權貴一時豪猾斂迹又申六諭興孝弟崇祀典簡鄉勇築隄防革火耗政多可傳以賢能調濬縣

成安志

彭希賢字耳知宜陽舉人天啟中令成安漳水逼城躬

督夫役竭力捍禦設粥廠置藥局以救災民全活甚多
又選士講武築柵欄城堡以備不虞朔望親講鄉約舉
善惡葺文廟書院聚生徒以時訓課民安化洽一時有
循良之稱

康熙志
參舊志

馮大任嘉定州進士天啟初合威縣性慈心愷凡利害
之在地方者殫力興革未周歲被奸人中傷去人咸惜
之

威縣志

李遇春揚州貢生天啟中合清河舊時臨清州窰柴邑
民苦於津貼遇春申請裁革民甚德之

清河志

王以問天啟中任永年丞數年人不敢干以私治事有

能名陞岐山知縣去之日行李蕭然人比之孫允中

年

志

雷徵一雲南舉人天啟中署永年教諭爲人溫和嘖笑
不苟諸生有枉抑力爲白時訓導某剛愎肆侮順受不
報稱長者所獎拔多知名士陞靜甯知州

譚謙浙江舉人天啟中署永年教諭性豪邁諸生咸受
啟迪居恒鼓琴繙書翛然無塵慮擢國子職

俱同上

冉峯思南舉人天啟中任肥鄉教諭高懷曠度博雅肫
摯學者宗之攝縣篆捕捶手之黨置於法尋陞彭澤令

肥鄉志

韓守讓晉州人天啟初任成安教諭清介不阿喜讀書善獎勵督學歲試邢臺合有庭杖諸生者眾忿激大譟於試院門學使者怒檄各學舉視守讓堅不應曰功名有定數終不欲誣人以媚人也卒以此去官諸生爲立去思碑於明倫堂

舊志

王法灤州歲貢天啟初任雞澤訓導博洽多聞尤精焦氏易與諸生剖析奧義皆中理解卒於官士人不勝哀

慕釀金以殮焉

雞澤志稿

李呈祥字五鹿隰州舉人崇禎中任順廣道兵備彊幹敏捷發奸如神郡中蠹役爲民害者次第擒治闔境肅

然

舊志

宋權字甫公河南商邱進士崇禎中以給事中外轉順廣道兵備時有驕兵久躡永邯之境以計去之境內獲安

同上

程世昌字際甫光山進士崇禎中知廣平府才識通敏剖決如流府學傾圯捐二千金鼎新之聚士課業評隲精當人皆悅服時寇盜四起鄰境多陷世昌決滏水圍城屹如金湯郡賴以無警會以艱去後官至巡撫

同上

歐陽主生字惺菴廬陵進士崇禎中知廣平府以清慎稱留心學校時進諸生課業建廣濟閘以興水利民多

三修廣平府志 卷四 三
賴之

康熙志
參舊志

范志懋虞城舉人崇禎中任廣平同知獎善疾惡人畏之如神明攝肥鄉篆羨金不入私橐盡以散諸貧民或助公役

舊志參
肥鄉志

張毓泰鄒平進士崇禎中令永年值除歲傳流寇入邢臺卽夜馳至臨洛鎮按保甲署名粉堞授兵登陴賊至知有備不敢逼會大名兵備盧象昇至擊賊走之

永年志

宋祖乙東平州進士崇禎中令永年爲人沈毅寡言笑胥吏憚之值大荒羣盜蜂起擒獲立斃之姦宄爲之斂迹時民苦徭馬等役申請去其太甚者聞流賊逼近引

就

舊志參
永年志

溢水圍城又爲守具甚備賊引去善培植人才多所成郝綱齊河進士崇禎中令肥鄉禦盜賊建磚城修養正書院才能肆應尋調任永年時值奇荒撫綏賑濟備極勞瘁造士有法人多執經問業者以卓異擢給事中

輔通志
參舊志

畿

王一鶚萬安進士崇禎中令曲周案無留牘兩代威篆實心愛民御史胥有法舊米豆津運所費五六千金大爲民害一鶚潛使人販糴代完以紓民困威人至今德之

曲周志參
威縣志

李巖萊陽進士崇禎中令曲周果敢任事值歲大荒練兵戢盜爲一方保障

舊志

劉時幹安莊衛舉人崇禎中令曲周時值兵警於城南立橫河土閘引水入壕城北障以隄一望淼茫賊至度不可攻引去邑賴以全

曲周志

陳之伸海甯舉人崇禎中令廣平任事一載百務精明清釐庫弊黠鼠潛蹤尤善政之顯見者尋調內黃百姓迄今尸祝之

廣平志

案浙江通志之伸天啟進士令廣平邑有津糧大戶役之伸言於按使去

其害民德之據此

廣平志作舉人誤

李固本洋縣舉人崇禎中令廣平實心實政士民感孚

在任三載賠累五千餘金丁艱旋里一主一僕行李蕭

然民立祠祀之後歷定州兵備道卒於官邑人爭往弔

焉

廣平志

張宏志字夢萊項城進士崇禎中令廣平戊寅亂後饑饉流離宏志從容安定各得其方縣舊土城易以磚石又開新街建書院士民賴之

畿輔通志參舊志

朱鼎鑣蒲州人崇禎末令廣平精明嚴整剖判明決衆

誦神君

廣平志

韓金聲雒陽進士崇禎初令邯鄲性嚴明疾蠹如讎僚僚不敢受民片紙

邯鄲志

顏允紹曲阜進士崇禎中令邯鄲性嚴明片言折獄人不敢干以私城守有功累擢河間知府死節

明史參康熙志

劉濬源曹州進士崇禎末令邯鄲廉介有清操時值兵

荒交困濬源以慈惠撫綏保全者衆旋調盧龍

邯鄲志

趙宋乾河南進士崇禎中合成安有惠政邑人祀之

輔通志

李宗昉

原姓趙

項城拔貢崇禎中合成安當積弊之時振

興教化務裨益於民生修葺學宮創建樓堞立社學以

訓迪生徒一時人文蔚起士民至今德之

合成安志

曹養鯤字圖南蒲城舉人崇禎中合成安邑食鹽少而

官引多往往散派里甲民以爲苦力請當事減之招撫

流民勸課農桑遇歉歲煮粥賑濟御史胥嚴無一敢舞

文者自下車至陞任野無差役之擾

合成安志

陳熙字貫生江甯舉人崇禎中合成安時值荒亂鄰境

饑民擾攘熙申明鄉約及保甲法練兵備禦邑卒無患

除諸借派供應復修學宮至解帶以襄厥事

舊志

屠斯立字繼思漢陽舉人崇禎末合成安時畿南屢祲

焚掠無甯宇斯立至簡閱健卒復移鄰封爲合勦計先

是邑之北鄙與肥鄉接壤肥鄉令郝綱文武才也北鄉

民多歸焉綱爲發兵捕賊民德之於東北二十里許建

報恩祠及斯立除書下綱喜曰繼思來賊可破矣及接
移文卽日合兵大勦以計擒伏間有聽其自新者賊遂
平

成安志

張幼安堂邑進士崇禎中合威縣舊有無名科派及俵
解徵收等弊悉爲蠲之民困以蘇

舊志

張儒商邳舉人崇禎中合威縣值歲大祲盜賊蜂起儒
督練總率兵丁屢殲渠魁卒使羣盜屏迹民獲安堵

威縣志

秦際暉三原舉人崇禎中合清河值土寇作亂饑民嘯
聚際暉督率勦捕屢斬渠魁餘黨解散

清河志

史欽明昌邑舉人崇禎中知磁州與百姓若家人父子
去後多令人思後有黃州舉人李爲珩來任治劇理煩

頗著能聲

見磁州志
職官表

李建功號雲臺鐵嶺衛人生有神力善騎射襲世職指
揮使授守備陞都司崇禎九年河北盜起合建功駐磁
州州西沿山一帶羣盜盤據賊首婁自揚保馬鞍砦負
隅不下建功率師攻之自揚就縛羣盜逃散河北漸次

就平

磁州志

張天爵華州人崇禎末任曲周丞剛介尙氣節遭僞官
孫應震之亂與諸生冀運洪等謀恢復不克死之

曲周志

倫彞號禹疇滑縣貢生崇禎中任廣平教授善訓士好施予凡士之賢者賙恤之觀宮墻傾圯捐金重修並修整簠簋琴瑟刻忠經孝經會典小學諸書以惠多士一時成就者眾以卓異擢知縣申佳允撰德政碑

汪光緒通州舉人崇禎中署永年教諭言動不苟教士先禮讓勤於課業品題精當值亂分守南城著有勞績

陞國子監學錄

舊志參永年志

劉國會字東之武陵舉人崇禎中任肥鄉教諭日與諸生衡文講藝惟慮不克稱職後遷商河令兵亂城破死之舊志

胡永亨交河歲貢崇禎中任雞澤教諭氣岸磊落善騎射時進諸生較射論文戊寅城破遇難士民哀之雞澤志稿

閻嘉興河間人崇禎中任威縣教諭賦性高潔博物洽聞而絕不言及阿堵物居一年不能與世俛仰遂挂冠去邑士大夫詩歌贈言市井鄉民亦環懇遺愛時人皆以閻夫子目之威縣志

李一性邢臺人崇禎末任威縣教諭質行醅樸待士以誠每遇艱危大事毅然以身任之士之被其德教者至今咸思念不置同上

崔世勳平山歲貢崇禎中任雞澤訓導性方潔御諸生

嚴而有禮姦民訟者以賂進卻不受戊寅城破死

康熙志

馬騰龍密雲歲貢崇禎末任雞澤訓導甲申流寇之變

與生員殷淵同謀倡義事敗爲僞令所殺母八十俱遇

害士庶爲之流涕

同上

張世澤汜水貢生崇禎末任成安訓導時丁改革之變

縣無長吏人情鼎沸紳民請暫理縣事精明愷悌地方

賴以安輯直指使及學使交章薦之陞東安知縣

成安志

孟念祖甯晉人崇禎中任威縣訓導樸心質行矩矱端

嚴誨人以孝弟爲先凡齋廡頹圯及神主敝缺者捐俸

補之遇春秋祭俎豆穀核務令豐腆毫無苟且諸生束

脯絕口不問焉

同上

王來章靈石人崇禎中以保舉任肥鄉簿儉約自處秋

毫無取於民攝雞澤今年餘士民詣闕保留者數千人

竟左遷去

舊志

師朝讓清澗人崇禎末任肥鄉典史善騎射時土寇四

起朝讓率義勇直搗賊巢焚其柵擒其渠帥餘遁去邑

賴以甯

畿輔通志參舊志

范蘭茂洪洞人崇禎中任雞澤典史戊寅之變蘭茂分

守四門圍急語紳士曰城沒不守吾必以死殉之越八

日城東北陷猶仗刀叱令埤人固守須臾其子至挽與

逃避怒曰從我來勿他往入衙爲兵所執不屈死有八

歲少子俱遇害

雞澤志稿

重修廣平府志卷四十五

宦績錄下

國朝

甘文燧奉天海城

原籍江西豐城

貢生順治初任順廣兵備道

時天下初定民心驚擾文燧撫鞠如承平後殉難鄖陽

郡人遙祭皆失聲

畿輔通志

樂斯美字馥字奉天歲貢順治中任廣平同知清苦自

勵民有酬博者婉詞勸諭煦煦然若家人父子陞知府

卒葬郡西論者謂其廉平寬厚與前任呂起渭之禮賢

造士俱有古風

康熙志

張逸字二瞻海豐進士順治初任廣平推官持身端謹處事詳明時兵備高登庸殘暴多虐政逸每事力爭民賴以安

同上

高珏字在衡淄川進士順治中任廣平推官方嚴沈重操履清廉一時蠹役勢豪凜然不敢犯擢御史

康熙志參舊志

宋調元山西舉人順治元年署永年知縣值大亂後民情未安調元撫育遺黎彈壓豪強境內大定任未久去

邑人思之

永年志

項日登遼東歲貢順治五年知永年縣肫誠和易與民相安勤於政事庶務就理

康熙志參縣志

王報春字育萬朝邑舉人順治九年知永年縣聽訟明決人不能欺開館課士多所造就買地鑿滏水月河以避水患民賴之各鄉車牛夫役總爲一籍遇公務以次撥用胥吏不得爲姦

畿輔通志參舊志

余維樞字中台婺源副貢順治十三年知永年縣葺學宮立義塾每聽訟一見其人卽歷久不忘以罍誤罷官

人皆惜之

畿輔通志

李時茂遼陽貢生順治八年知曲周縣明決剛毅綽有志略土寇王昌跳梁境內下車設法捕殺之葺奎閣建倉廩修邑志創濠棚練兵保境煮粥賑饑善政不可枚

舉尋以御史行取同

吳應文瀋陽人順治二年知雞澤縣性慈祥簡易有犯法者不忍苛以刑修葺學宮城池衙署隄橋百廢具興續修縣志嚴城守清保甲徵糧無羨餘凡上官移文有不便於民者輒再三申請邑人戴之同

劉秉政奉天貢生順治四年知雞澤縣沈毅明斷待胥吏甚嚴與民休息不事煩苛擢御史累官福建巡撫舊志

參雞澤志

羅霈豐城舉人順治九年知雞澤縣莅任卽捐貲興修學宮務本重農實心勸課士民皆感悅陞順天刑廳去

未幾罷職虧帑貧莫能償邑人聞之各貲貲代納後以事復經雞邑人爭餽贖遮道祖送者數十里舊志

袁鴻謨睢州進士順治十七年知雞澤縣興廢舉墜一塵不染設門兵清衛地疏鹽引尤爲便民尋陞戶部主

事畿輔通志

張邦寄奉天人順治中知廣平縣正直坦率恩威兼濟文事武備一時修舉士民德之歷官紹甯兵備廣平志

馬剛號裕三睢州進士順治中知廣平縣政尙嚴明盜賊斂迹隆禮賢士修葺文廟煥然一新有生祠在儒學右同

顧如華字質夫湖廣漢川人順治己丑進士知廣平縣
奸民周自好偽造印信前令急捕逃入山東引賊犯縣
境如華備守具開門納難民探知賊巢榆林接於黃河
窪下窟用生員周布南計領馬步鄉勇決河上流灌之
賊死者無算乃出乞撫榆林平癸巳夏漳水泛濫肥鄉
成安諸縣浸沒如華豫培隄堰廣平得無患後擢御史
廣平人生祀之祈年禱疾皆往焉白茅堂集
高爽號日霽武城進士順治末知廣平縣練達持重政
不擾民百姓爲建生祠於東關廣平志
韓思敬金州衛貢生順治中知邯鄲縣值鼎革之初爲

政務敦大體下車卽飭立文會品題精當多士悅服尋

陞東昌知府邯鄲志

完自成甯遠衛貢生順治中知邯鄲縣性慈祥與民休
息當兵馬倥偬之際能調濟之民賴以安陞渾源知州

同上

喬振翔蒲州舉人順治末知邯鄲縣沈毅寡言甯靜不
擾歲大旱步禱聖井岡往返四十里無難色甘雨立應
民德之行取御史同上

鄭一元義州人順治元年知成安縣值兵燹後地畝荒
蕪請蠲租稅以里社徵派申作本戶正供部徵米豆改

解折色又立官廩以養馬民累頓除有山東巨寇竄入

邑境一元率數騎捕之賊不敢犯

畿輔通志

朱顯文瀋陽人順治三年知成安縣比歲不登正賦孔棘諭民完納銀錢各便羨餘分毫不取訟者剖斷是非能改過卽免其罪每朔望詣學諄諭諸生以奉公守分勵學進修士民胥悅

成安志

沈昇初字東生長洲舉人順治十二年知成安縣性明決人不敢欺值歲旱昇初語士民曰大旱不雨令不德也賦稅不完令不才也惟有投効去耳聞者風動爭爲輸納勸農桑清獄訟審編常例一切罷去陞兵部主事

畿輔通志

袁天秩睢州進士順治三年知威縣遇事嚴明狐鼠屏迹崇重學校潔己愛民及調煩去士民攀留絡繹數十里立去思碑

威縣志

藺一元松江貢生順治四年知威縣值羣盜蜂起一元

督率丁壯設法捕勦邑賴以甯

舊志

龍納銘漢川進士順治九年知威縣明察廉介除豪強

清盜賊革耗羨士民愛戴

同上

綏酉生安陽舉人順治十七年知威縣時學宮久廢幾無遺址酉生力爲鼎新泮宮門牆煥然改觀月課躬親

督試拔其尤者優獎以示鼓勵士多所成就爲政尤寬嚴互用德威並著士民至今思之

威縣志

陶天培遼東拔貢順治元年知磁州賦性寬仁當鼎革之初一切與民休息民頗安之陞襄陽同知

磁州志

高翼辰灤州舉人順治二年知磁州剛斷精明案無留牘士民畏服陞汝甯同知

同上

何中舉瀋陽貢生順治十年知磁州潔己自奉實心愛民供應大兵過境閭閻無擾陞江甯知府

同上

董大信洪洞舉人順治十七年知磁州英斷廉潔左右凜然三年不興一役務與民休息民德之

同上

王季命行唐歲貢順治十三年任雞澤教諭新生應進贅禮察其貧乏者卻不受復給以膏火資後署縣事遇徵取車騾倉卒立辦蠹吏弊竇一無所容人以公正才幹稱之陞長子知縣

雞澤志稿

黃伉元城舉人順治十七年任雞澤教諭樂與人爲善月設二課嚴肅如棘圍次日復聚於明倫堂手披口講受教者皆心服

舊志

張燮大興縣貢生順治十五年任成安教諭值漳水入城文廟俱圯燮捐金修葺規制一新立聚奎社與諸生杯酒論文娓娓不倦貧者佐以膏火遷常熟令去多士

立碑於明倫堂右舊志

童煒祁州舉人順治十八年任成安教諭以立德存心
為訓文昌祠奎光閣久圯捐金重建又立觀社以課士
人文日盛同上

張文韜新城舉人順治中署威縣教諭博極羣書勤於
化誨日與諸生講論經義考課文藝士賴以成就者甚
眾威縣志

錢亶直隸貢生原籍浙江錢塘順治中任曲周訓導教以品行
為先修脯必卻從遊之士經其指授皆力敦文行蜚然
有聲後卒於官無子邑弟子醵金公葬於滏河東北隄

外曲周志

王國瑾昌平歲貢順治十四年任雞澤訓導忠信待人
不修邊幅集本學知名士於金龍閣課業捐俸備饌寒
暑不輟後奉裁改補順德雞澤志

金必達會稽人順治中任永年典史練敏知大體事無
巨細立為剖決清介自守有士君子之風焉嘗曰官無
大小在我樹立耳去之日送者如市舊志

王賢會稽人順治初任威縣典史時水旱頻仍盜賊未
靖賢巡緝有方勸懲有法不逾年境內甯靜三載擢長
樂巡檢先有阮萬象者亦會稽人廉靜淡雅不以賄聞

威人至今思之威縣志

石佳彝奉天貢生康熙中知廣平府抑豪強清衙蠹一時姦徒斂迹百姓晏然擢蘇松鹽法道舊志

王嗣衍貴州進士康熙中知廣平府值歲饑貸粟賑濟困者獲蘇捐俸創建學宮并各祠宇次第修舉賑貧乏表賢良鋤強暴實心圖治民不能忘祀崇報祠畿輔通志

張廷勳奉天鑲白旗監生康熙中知廣平府時磁州隸豫省建閘遏溢河上流永邯曲各縣民不獲沾溉廷勳議分日啟閉以均水利事方申請以艱去迨赴補即具摺陳奏後經兩省會議磁州改隸廣平酌定放閘日期

永垂良法舊志

王家楨山陽進士康熙五年知永年縣吏治精明會有運木之役調度有方民不知擾舊志參永年志

梁炳宸高明舉人康熙七年知永年縣執法無私不輕遣一役輕發一符鄉民安枕尤優禮賢士彈壓刁風一時稱循良焉同上

朱世緯固始舉人康熙九年知永年縣下車首葺學宮次修城隍廟皆躬自督率尤勤於民事有急務即立決之政餘纂修縣志考核詳明諸生貧不能赴試者出廉金以助其崇儒好士類此畿輔通志參舊志

陳應中字麗西東莞舉人康熙二十年知永年縣縣爲
人文淵藪自明以來甲第聯綿至是少衰應中加意培
養日與邑人士講學於漳川書院文風復振任七年報
最擢廣西道御史

舊志參
永年志

張耀江夏舉人康熙二十八年知永年縣值大旱飛蝗
徧野捕之不勝乃具牒禱於城隍廟翌日蝗皆自斃一
時驚爲神異任二年卒邑人哀思焉

同上

于有慶廂黃旗官學生康熙四十一年知永年縣吏治
精明未嘗輕用刑威而人皆畏法任十餘年民氣和樂
倉庫充盈陞武岡知州

同上

徐闡漢武進舉人康熙末知永年縣值歲荒極力拯救
民沾實惠洛西災重被澤尤多

永年
志

李允登南部進士康熙六年知曲周縣清廉方正講學
課農俱以實心化導不務虛名士民至今思之祀名宦

畿輔
通志

張焯惠安進士康熙八年知曲周縣時值旱荒首申請
上官蠲賑復督修濠柵團練民兵用伍保法盜賊由是

屏迹

同上

袁綺澄海舉人康熙十一年知曲周縣政尙寬簡潔己
惠民興學校勸農桑孜孜若不及比去民懷德立祠奉

之舊志參
曲周志

陳憲道邵陽舉人康熙二十七年知曲周縣優禮士類勤恤民隱明斷嚴潔待胥吏不假顏色邑人畏而愛之

同上

李銘溧水舉人康熙二十八年知曲周縣清而不刻尤喜培養人才每課試悉心評隲士經指授多所成就同上范大士如皋貢生康熙三十八年知肥鄉縣創建義學清釐地糧革社書浮額除免辦解芝麻草豆諸費邑人

賴之畿輔
通志

許國棻開原監生康熙四十年知肥鄉縣時漳河衝決

邑東南六十餘村垣屋皆墟國棻築長隄以防水患又墊解葫蘆營等村三年逋賦民困獲蘇同上

王能任鍾祥貢生康熙五十六年知肥鄉縣邑城久爲漳水嚙沒下車卽修復之衙署倉廩次第興建尋以憂去畿輔通
志參舊志

姜炤字楚白萊陽進士康熙七年知雞澤縣風格嚴肅人不敢干以私創義學修邑志增築鳳起山盜河潰決民苦之炤買地濬新河水患永息民立治水亭以志不忘畿輔
通志

朱冕字存蓼山陰副貢康熙十四年知雞澤縣政尙寬

仁緩徵輸勤課士憫沙水爲患鑿三渠使入泊又深濬
浮圖店南渠永杜聞患民便之

同上

樓尙崢鑲黃旗監生康熙中知雞澤縣勤於吏治實心
愛民以通賦呈誤輿論惜之

雞澤志稿

祝增海甯舉人康熙三十六年知雞澤縣清廉明慎不
尙苛察治民以子惠爲主邑固瘠貧力爲整頓未竟以
艱去後有李新德者寬宏公正實心愛民民至今感戴
之

同上

譚尙箴字克非衡山進士康熙三十九年知雞澤縣倡
修義學每課士必面與講解文藝優者厚給獎賞有應

童子試者卽免其差徭人知向學文風蔚起

舊志

袁良怡興國貢生康熙五十八年署雞澤縣才識明敏

聽斷如神杜絕科派優禮儒士士民愛之爲立德政碑

雞澤志稿

劉士玫涇陽舉人康熙五十九年知雞澤縣精明慈惠
民受其福因解餉軍前積勞卒於官士民哀思焉

雞澤志

張思齊奉天廕生康熙中知廣平縣增修護城隄重建
文昌奎星二閣又於城外東南之缺開新渠以衛城隍
置橋梁以通往來成安肥鄉二縣被水流亡入境者思
齊自以錢米賑濟尤盡恤鄰之誼尋以憂去邑人爲建

重修廣平府志 卷五
春熙書院志思慕云

舊志

華士捷字亦三江南

舊志職官作衡陽

舉人康熙中知廣平縣

漳水舊徑邑界泛濫不時士捷疏濬上流水患遂息城隍解舍廟學久就頽廢士捷以次修建在任十七年卒

於官祀名宦

大清一統志

熊綸光山進士康熙中知邯鄲縣值大旱步禱輒應邑當衝要驛馬應差皆撥民間喂養民苦之綸捐金買地創馬棚數十間公私稱便

畿輔通志

蕭秉楷孝感拔貢康熙四十七年知邯鄲縣邑當孔道諸費悉派里下秉楷悉除之歲饑多方賑濟無一流離

失所者有將軍差捏盜圖詐秉楷廉知其情曰此地差使絡繹若奸詐得行民受累無窮矣遂案律具詳差使懼白盡竟坐是削籍去邑民泣送至黃河始還

畿輔通志

王公楷字木重潁州人順治辛丑進士康熙八年知成安縣鄰邑有告夫被殺者株連數十人公楷奉檄理之訪其里中自某死後有屠沽兒往外未歸卽命踪跡捕之果得因姦殺死狀獄遂決縣苦漳水公楷請豁潞河地租晝夜行泥淖中率民築隄防疏通畎澮水竟西徙以丁內艱歸

畿輔通志

党振聲華州進士康熙二十七年知成安縣值歲荒設

法勸輸全活甚眾邑人感其德祀仰功祠舊志參成安志

馬九思遼東貢生康熙二年知威縣明敏有才幹吏不能欺時有奸徒相聚為害九思察其尤者痛懲之豪強

斂迹畿輔通志

高汝樽萊陽進士康熙中知威縣值歲歉力請賑饑全活無算環城植柳人比之甘棠云同上

盧士傑字漢三錦縣舉人康熙十二年知清河縣釐奸剔弊薄斂省刑差徭案丁均役除一切浮費自學宮城池察院署宇以次修舉又捐資於郭外鑿井以便行人至今往來過者猶呼曰盧公井邑人立祠肖像尸祝焉

胡悉甯祠堂記

劉學坦華容舉人康熙中知清河縣嚴禁娼賭革除一切私派疏馬賴河民商稱便以艱去任祀名宦畿輔通志參

舊志

沈志禮鑲白旗人康熙三年知磁州歲旱開渠引水溉田秋禾乃登徵收賦稅不差一役而賦亦無虧大清一統志

趙纘灤州拔貢康熙十一年知磁州遇事剛斷不畏豪強州南東陳等六村有沙壓地民苦賠賦纘為覈額外首地墾荒田五十二頃抵補之減積累無算陞同知畿輔通志

任塾懷甯進士康熙二十年知磁州性廉介抵任盡革陋規以學宮頽廢鬻產五百金修之崇文課士科目浸興後祀名宦同上

朱廷相奉天廕生康熙二十五年知磁州明察平恕案無留牘訟不株連陞禮部員外郎州人立祠祀之舊志

蔣擢大興人康熙三十五年知磁州性嚴毅人不敢干以私疏渠道興水利修廢舉墜百度維新以卓異陞戶部員外郎畿輔通志

趙達永年志新河舉人康熙中任永年教諭學問淵博品行端方訓課諸生寒暑不輟舊志

衛蕃灤州舉人康熙中任曲周教諭設文會悉心講論諸生有問必厭其意以去後以病謝遂僑居焉邑人士敬事之如在官時同上

蕭九奏衡水舉人康熙中任肥鄉教諭修葺學宮創建學署均捐俸爲之不以擾民肥鄉志

穆九成大興貢生康熙中任邯鄲教諭豪爽多義舉所得俸資盡以濟貧士有請業至者必反復指陳每課必自構二藝以爲程式居數年以改補去舊志

王之儋完縣舉人康熙中任成安教諭諸生進謁必以道義相規立麗澤社爲文會無間風雨卒於官門人爲

立碑於明倫堂側

同上

張瑋義州歲貢康熙中任雞澤訓導砥節礪行訓士有方嘗植槐柳百餘株學宮掩映可觀後卒於官遂僑居焉

同上

要運昌南和貢生康熙初任成安訓導明經義善啟發資諸生以膏火薪水使閉戶讀書或貧不能婚葬者捐俸爲助倡修學宮規制煥然值漳水入城當事者倉皇莫措運昌出錢募人決西北城洩水一時居民安堵厥功多焉

舊志

吳元春汝陽舉人康熙中任磁州學正方嚴廉靜勤於

訓課尤工詩善書著有訟齋集

同上

張隆基上元縣人康熙四十七年以掾吏任邯鄲尉敦樸謙和廉慈勤慎與民相習如家人父子任十二年以疾告休送者遮道有古之遺愛焉

邯鄲志稿

龔佳憲仁和人康熙中任威縣典史工書能詩恂恂儒雅在任緝盜有方愛民無擾去之日行李蕭條送者擁集郊外不下數千人皆爲太息

舊志

李梅賓字與素桂林進士雍正中知廣平府慈惠清勤案無留牘自奉甚儉餘俸盡以散諸貧民及捐修祠署屬邑多無地浮糧民苦賠納梅賓清釐豁除令欺隱者

自首免其追徵以現年起科補額由是正供無缺積困頓舒洺水暴漲灌城親行泥淖中督率壅堵郡人德之

同上

侯可大西華舉人雍正五年知永年縣臨政明決邑中利弊釐然偶出語輒中情事聞者驚爲神明吏胥畏法

豪棍潛踪

舊志參永年志

丁應蕙字蘭友諸城舉人雍正十二年知永年縣有構訟者責鄉長拘喚不以差役累民城北引渠種稻多水患應蕙塞通水閘民便之調任井陘邑人繪攀轅卧轍

圖以送

畿輔通志

萬申祺宜興人雍正中攝肥鄉知縣漳水溢呂家堡等四十餘村被災尤劇申祺請賑請蠲復捐資以給窮困比去邑人遮道送之爲立碑以紀其德

畿輔通志參舊志

王建中錦州進士雍正八年知肥鄉縣精敏廉幹不畏權勢事至立剖無留牘修建城垣衙署文廟及行臺營舍嚴夜警禁賭博闔境肅然

畿輔通志

宋鏗黃岡貢生雍正十二年知肥鄉縣虛懷下士實心敷政除人命盜案外一切訟詞俱令自拘以免差擾人咸稱頌焉

肥鄉志

郎銘鑲黃旗監生雍正二年知雞澤縣值大水報災屢

被批駁銘以實情涕泣面陳上官感動得奏請賑濟有不及者出已資給之一時均沾實惠

畿輔通志

黃在中字公瓚宜春進士雍正六年知雞澤縣廉明有聲邑支河決在中督民防堵上官稱其能以丁艱去官

宜春縣志

雞澤志云在中任邑令愛民若子待士以

禮凡有餽納者卻弗受值亢旱齋宿城隍廟兩旬得雨始回署嘗憫書役逋欠貧無可償為捐俸代補七百餘金尤為難得

鄭方坤閩縣進士雍正五年知邯鄲縣存心仁厚處事

精明葺學宮備祭器修邑志在任四年以卓異陞去

畿輔通志

單鉉高密舉人雍正九年知邯鄲縣為政嚴明胥吏有

不奉法者必重懲之事至立剖訟無留宿莅任年餘境

大治

同上

徐時作建甯進士雍正七年知成安縣捐修學宮邑賦多缺額時作清釐地畝令隱漏者以實自首正供既足

派累悉除

畿輔通志參成安志

俞鴻馨海鹽進士雍正中知磁州值大水壞民廬無力興修者捐俸以助漳濱民地為他邑侵佔積訟不決鴻馨案志圖正之鄰民屈服又詳除漳村等水淹石壓地糧民免賠累卒於官州人立祠以祀

畿輔通志

殷之英甯津舉人雍正五年任永年教諭性醇謹取予

不苟教諸生以立品修行爲先諄諄如家塾訓課有方

多所成就

永年志

傅基孔字裕原靈壽拔貢雍正初任威縣教諭訓課弟子以孝弟廉讓爲先多士景從學宮久圯基孔與張合鳳光力圖興復邑人感其意各捐輸以助數年而成殿廡齋署一律巍煥在任二十餘年敬事勵躬始終一致俸滿將遷引年告歸

舊志

侯元勲承德歲貢雍正中任曲周訓導創建學署重修學宮毅然力行之每一工畢籍其所費絲毫可覆勘至今廟學閎廠堅麗實賴其力

舊志參
曲周志

趙時傑海城貢生雍正七年任肥鄉訓導耿介嚴明以

正道率人諸生有過失正言厲色無所諱少年浮誇之

氣對之輒消又捐修學宮董城工有勞勩焉

肥鄉志

吳穀字朔占烏程進士乾隆八年知廣平府政行民樂

綱舉目張郡志久未續修穀博考舊聞手自編輯閱歲

而書告成百廢以次興舉有古循吏風

舊志序兼
採訪冊

王之導清澗進士乾隆四年知永年縣每循行村落召

父老詢疾苦勸農桑煦煦若家人民亦戴之如父母邑

有豪棍通權勢於繇村等處私挖煤窑之導請立石禁

止邑人德之

舊志參
永年志

孔廣棣曲阜貢生乾隆二十年知永年縣明斷有爲百廢具舉葺學宮纂邑乘邑舊有漳川書院廣棣爲更名紫山增建廨宇以惠士林又建留養局於臨洺關規畫詳善士民德之

永年志

李景梅上蔡舉人乾隆五十八年知永年縣嚴明彊毅簿書盈案剖斷如流常至夜分不休復以時涉阡陌勸課農桑整飭士習遇縱恣鄉里者痛懲之不少貸履繩蹈檢之士又必接以禮容或親與點定文字視如弟子尋攝廣平府事亦有聲在任二十年士民追思之爲作去思歌

同上

周碩勳甯鄉舉人乾隆元年知曲周縣勤敏明察爲政持大體不尙苛細能析疑獄歷三年調青縣民多頌之

曲周志

陸拱辰上虞監生乾隆四年知曲周縣樸質廉重待人

不設城府以寬厚爲治吏莫敢欺邑社學久廢謀興之

創立毓英書院以勞卒於官

畿輔通志

勞宗發錢塘進士乾隆十一年知曲周縣博極羣書纂修邑乘以存文獻關心民瘼爲政一本經術比去兩袖清風道路咨嗟

曲周志

鄭大進揭陽進士乾隆十年知肥鄉縣潔己愛民政平

訟理尤加意士林擇其秀者親督課之授以文法崇德書院傾圯改建於學宮前加膏火以恤寒士厚修脯以延名師人文大振後累官直隸總督邑士民思慕不忘刻其政績於碑肥鄉志

戴芬舊志職官作蔡華亭舉人乾隆二十九年知肥鄉縣時邑

治初復舊理諸事草創難以經久芬質城以磚學宮武廟以次修舉暇則進諸生獎掖之士民戴德畿輔通志參肥鄉志

張炳題仙居進士乾隆二年知雞澤縣性寬和多惠政邑舊有牛驢雜稅炳題捐俸代為完解又堵塞淫河溢

口不辭勞瘁以丁艱去前任蕭山毛鈞政亦祥和愷悌禮士愛民至今人咸德之雞澤志稿

李世基閬中進士乾隆七年知雞澤縣勤政愛民興修水利建城西雙塔村五閘又於邢家隄建利民閘溉田俱有成效至今利賴同上

王光燮字麗三江南武進人乾隆二年進士十五年知雞澤縣鑿邢家隄建青龍閘通城濠水利濬溝七道建七利閘溉田三百餘頃沙河為害縱橫二十餘里水漲時汪洋一片出入舟行光燮舍河畔召民濬之二旬工竣沙患以甯建書院招秀民肄業其中公餘輒過之經

其指授多掇科第歲旱盛衣冠禱赤日中雨不應首觸城東龍王廟石碑血涔涔下天遂雨京軍過臨洺關雞澤當出車五十輛故事先期遣吏選民馬吏緣爲奸光燮案鄉亭定出車數書其值令民自擇至期乃會調邯鄲時廐騎詣邊暫假民馬供役並令民自具芻牧民苦之光燮貸富人馬十而假一官爲畜之役罷還其主僕者予值捐廉置舍市民賴焉河東鹽地壞西商借長蘆引由漳滏兩河運所過郡縣爲扶持各有餽謝光燮峻卻之左右或以爲言不可旣而事覺受者皆呈議後卒以會讞事免官

趙懷玉亦有生齋集 雞澤志稿云光燮因旱祈雨不應頭觸碑石而死吏民

環泣大雨立降光燮亦蘇迄今石上髮泥猶在邑人傳爲遺愛知縣丁紹基以光燮附祀九龍廟西側光緒六年公舉附祀名宦

王錦林蕭山舉人乾隆二十一年知雞澤縣勤能廉儉以實心行實政挑濬牛尾河工興半載錦林時往指畫輕車減從無一毫擾民民感戴爲樹德政碑

雞澤志稿碑記兼採

訪冊

陳鶴翔字蠹善南海人乾隆丙子舉人知廣平縣漳河決賑災鶴翔親檢丁戶悉祛夙弊躬率夫役築隄堵決口捐俸二千餘金口三合三決鶴翔哭禱於河役者踴躍助之口遂合隄長十餘里植柳數千株民呼隄曰陳

公隄柳曰陳公柳

廣東通志

張漢松乾隆中由進士知廣平縣政簡刑清輿情愛戴整飭地方百廢具舉捐修衙署自製大堂楹聯云推赤心置民腹中那堪爲父爲母看青天在我頭上何敢作福作威又有楊令字駿烈佚其名貴州進士乾隆中知廣平縣多惠政去任民思之附祀華土捷祠額曰清廉

仁慈

採訪冊

吳高增嘉興人乾隆中由行唐知縣調任邯鄲實心行政每事恪守先民矩矱邑舊有前明令胡秉中教民三圖高增更益以呂叔簡冠婚喪祭四禮圖邑人士得所

觀感咸彬彬知禮風俗爲之不變

宋英玉碑叙

韓本晉乾隆三十九年由進士知邯鄲縣書院舊無膏火捐俸供給每課躬親校閱士有貧不能赴試者贈以金有人倫鑒凡所賞識先後皆獲售去

邯鄲志

沈寅涇州人乾隆五十五年知邯鄲縣撫愛士民維持風化邑北五里鋪李米姐以拒強被害寅爲捕凶治罪申請建坊立石以表其墓邑人至今稱之

同上

李曰瑞字輯五吉水人雍正丙午舉人知成安縣先是成安連歲苦蝗民間有李公來成安安之謠及曰瑞至民歡呼載道在任十載蝗不入境後四十年從姪蔚字

若華復以乾隆己酉舉人署成安凡曰瑞所立政績悉整飭之蝗亦不入境人稱成安賢令兩李公

古水縣志

李聯璧字瀼西瑞昌副貢知成安縣地當漳水之衝隄屢嚙決聯璧相度形勢建小隄於上游河流底定大吏

重之

瑞昌縣志

劉漢黎鄆陵人授清河知縣清爲衝要區民疲奔命往往他徙漢黎除其逋賦數月增戶數百邑故以丁田定賦額站支之費悉取給於丁徭歲費無算漢黎編審增減有差民無不均之歎

畿輔通志

王炯深澤廩貢乾隆中任邯鄲教諭性耽典籍勤於訓

課尤擅著作才重修邑志刪繁蕪存典要考核詳備體律謹嚴郡守劉邦憲嘉之

邯鄲志

徐烺字漑餘錢塘進士嘉慶二年知廣平府政平訟理百廢具興重修文昌閣清暉書院延師課士以十邑每年公費銀八百兩作爲修脯膏火拔士中之尤者肄業其中捐廉優獎以示鼓勵人文爲之一振

採訪冊

張翔字拙山濰縣進士嘉慶二十二年知廣平府勤於聽斷案無留牘前後三任十有餘年如一日加惠士林延請錢塘進士鄭城主講書院擇士之秀者使肄業焉月課試士復親臨指授人文蔚起至今數十年科名不

絕郡人士德之同上

孔繼鴻曲阜進士嘉慶十一年知永年縣遇事明敏案無積牘頻年亢旱兩河泛溢繼鴻盡瘁撫恤民忘其災任未久以憂去邑人思之永年志

姜人烈象山舉人嘉慶十三年攝曲周篆整修書院宏獎士類任甫三月去紳耆惜之爲繪攀輿圖閱七年復任竹馬爭迎歡聲載路政聲視昔尤振曲周志

馬如麟山西人嘉慶十八年知曲周縣歲祲力白上官請賑停征公費不給以家資助之饑民聚掠親往撫定一時稱爲循良畿輔通志

劉澧銅梁舉人嘉慶二十年知曲周縣重修書院文昌閣魁星樓振興文運城中水向不堪食開閘灌隍井泉俱甘又繞城植柳佳氣鬱葱去後民思愛如甘棠畿輔通志

志參曲周志

陳建會稽監生嘉慶末攝曲周篆洞悉利弊法令嚴明差徭不濫忠義祠久廢捐廉重修維持風化時稱能吏曲周志

萬永福雲南蒙自縣進士嘉慶十一年知肥鄉縣性端謹堂事畢終日夜冠危坐歲旱步禱誠求不辭勞瘁額外窮民月給斗米捐金生息立案永遵又刻勸民俚說

頒發各村以移風俗

肥鄉志

鄭城字念橋錢塘進士嘉慶十四年知肥鄉縣好汲引後進提倡宗風來學者延之署中集鳳樓供給而督課之永年威縣士子皆來就學先後成名者踵接後罷官掌教郡城文風爲之一變

同上

程正階塾江舉人嘉慶十八年由同知攝肥鄉篆值歲旱民饑正階詳請蠲免錢糧賑濟銀米民賴以生時河南山東教匪倡亂人心震搖邑當大廣衝途兵差絡繹正階支應彈壓四境晏然

畿輔通志參肥鄉志

金鳴琴福山舉人嘉慶二年知雞澤縣值歲屢歉鳴琴

撫恤安綏民鮮流徙督農田興水利務在民沾實惠公餘課試士子邑人至今德之

王棘亭年譜

周壽齡蓬萊舉人嘉慶十八年署雞澤縣值歲旱民饑力請賑濟全活甚衆豫東教匪屢竄縣境遭害幾遍壽齡募勇緝捕日夕不懈民德之稟乞留久任閱二年餘

始卸任去

雞澤志稿

鄭長年武威舉人嘉慶十三年知廣平縣惠愛黎庶卓著循聲十八年歲大饑滑縣教匪倡亂兵差絡繹苛索無厭長年以一身供應民不擾而吏無苦迄今父老猶傳頌不置云

採訪冊

江叔渠卽墨進士嘉慶九年知邯鄲縣有控忤逆者責懲後令其子在署服役觀定省禮卒感泣求去母子如初文廟傾圯捐金重修書院廢弛蠲免差徭供給經費又詳定條規刻石爲永久計士賴以成就者甚衆邑人至今德之

畿輔通志
參邯鄲志

蔣士鎔汝陽進士嘉慶十一年知邯鄲縣邑西舊有石隄以障沁水後壞士鎔重築視舊堅厚有加迄今水不爲患邑人利賴

邯鄲志

楊本濬字清臣南甯進士嘉慶二十五年知邯鄲縣明決慈仁整頓書院疏導沁水減差車儲倉穀建養濟院

善政甚多有古良吏風

同上

孫培曾掖縣舉人嘉慶三年知成安縣悃悃無華一以愛民爲務公餘之暇網羅散失續修縣志以爲將來文獻徵凡所興舉皆以實心行實政有古循吏風焉

成安續縣

志序

博爾多滿洲人嘉慶十三年知磁州治尙寬仁實心任事歲旱祈雨鼓山烈日中步行數十里雨隨立降文廟廢頽僅存基址捐金修復各祠宇以次興舉又修書院籌經費延師主講加惠士林在任數年善政多有可紀解組歸州人設位祀之

磁州志

何道榜靈石人嘉慶十六年知磁州性剛毅果於任事
值滑縣教匪作亂警報頻仍道榜布置嚴防人心無恐
兵差過境一切供應親臨督辦有擾民者執白其主帥
帖然無一敢肆歲大稔匪徒聚眾搶掠道榜以計擒其
渠魁斃之餘眾解散境賴以安

同上

王殿傑涇陽舉人嘉慶二十二年知磁州聽斷明允加
意士林課士書院局門面試拔取真才豐其膏火令入
院肄業公餘不時親臨督課一時文教振興政成以卓
異陞東路同知

同上

任克閻文安舉人嘉慶中任肥鄉教諭學有淵源善於

訓課因材施教俾高下各盡所長一時成就者眾

肥鄉志

孟軻東安舉人嘉慶中任曲周訓導操履端詳熟精五

經文藝高雅敏捷津逮後學甚眾

曲周志

高彥玉田舉人嘉慶中任邯鄲訓導勤於督課訓誨周

詳邑多士至今頌其教澤

邯鄲志

沈濤嘉興舉人道光中知廣平府崇儒重道勤政愛民
永年差徭過重民不堪命屢稟請變通皆爲胥吏阻隔
廩生趙某欲面見縣令代達民情胥吏懼露其奸羣毆
斃命民間忿怒不期而聚者數千人相與入城理論縣
令誤以民叛上聞急請發兵濤止之不獲先諭民解散

代爲申請辨冤隱患始消差徭亦減郡人至今德之採訪

冊

錢日烜仁和人監生道光初任廣平通判喜培植士類以前任王裕銓清格先後創修秀洛書院未竟事慨然爲己任商之同知李銘紳以郡城東葦地百餘畝向備兩署辦公之需捐爲諸生膏火復勸捐十屬牧令各出廉金以助延師修脯費勒石以垂永久士人至今利賴

採訪冊

段上功字芝軒清苑進士道光初任廣平府教授嚴氣正性學問優長勤於課士諸生受業者學舍幾不能容

在任十餘年成就人才甚衆同上

沈惇厚字心石歸安人道光三年知永年縣修葺紫山書院關帝廟墊四關大路修建南關閣皆捐俸爲之以累民後陞大名知府永年志

馬錫書字季眉介休人道光八年知永年縣政簡刑清與民休息時郡守額爾經額修府學贊其成者錫書一人力也同上

彭玉雯字雲墀甯都舉人道光十二年署永年縣勤政愛民案無留牘尤長聽斷下莫能欺每夜巡行城內嚴禁嬉游重懲盜賊里巷肅清後歷官至直隸布政使同上

陶金殿滁州拔貢道光十四年署永年縣識遠才優案無留牘野無逋賦尤以廟學爲急務前人數十年未竟之工金殿不數月而成之學校爲之一振

楊兆璜廟學碑記

玉鎮字鐵崖蒙古正紅旗舉人道光十五年署永年知縣明斷有爲勢豪斂跡隆冬每微服冒風雪巡夜人服其勤洺水久爲邑患十四年盛漲決西隄郭內四關廬舍盡沒鎮至修路築隄改鳳凰閘以洩水洺害爲減工竣餘錢數百萬存案

採訪冊餘錢四千串

發商生息咸豐九年挑

濬城濠公私窘迫賴以濟用焉城南五里滏河濱有樓基距水近易壅決值滏水大漲急令毀之以弭患待士

有恩貧不能就試者助之資邑人至今德之後歷官清

河道

永年志

蔡爲章德清拔貢道光元年知曲周縣大修文廟優待

士林每課試飲食教誨禮意有加

曲周志

謝鳴謙大足拔貢道光十一年知曲周縣英年幹敏廢墜振興任甫三月政聲頗著以勞勩卒於官

翟宮槐壽光進士道光十四年知曲周縣折獄惟良洞悉民隱任未久去百姓惜之

胡啟文汝陽進士道光二十七年攝曲周篆心存撫字力革蠹吏宿弊案無停牘暇則至鄉村催勸農桑切切

如家人父子書院廢弛延師考課時進諸生講學先德行而後文藝卓然有古循吏風

俱同上

查揆海甯舉人道光四年知肥鄉縣和平渾厚政簡刑清撫字催科曲盡其道文章淵雅暇卽與諸紳士倡和往來爲一時韻事

肥鄉志

李步瀛江蘇進士道光中知雞澤縣明敏有吏才生聚教誨治化彬彬至今人猶稱之

雞澤志稿

王燕堂榆次進士道光六年知廣平縣書院久廢首先整頓月課試士優加膏獎餉饌進諸生講解經義娓娓不倦有報盜者躬自踪跡追之闔境肅然建義倉以備

荒各村道里遠近繪圖詳註凡有差遣案圖定期蠹役無可假手以故案無滯獄吏無擾民咸愛戴之

採訪冊

于因承德優貢道光二十六年知廣平縣慈惠廉明儉於自奉課士優給膏獎餉饌歲歉躬往各村勘驗明確自爲筆記詳請蠲緩胥吏不能爲詐清獄訟嚴盜賊境

內晏然

同上

富陞額滿洲正白旗人已卯進士道光七年知邯鄲縣庚寅地震壞民房無數富陞額詳請上官給銀修補壓斃者給櫬銀冬煮粥賑濟民德之

畿輔通志參邯鄲志

張恩溥江西人道光癸未進士壬辰知邯鄲縣撫愛善

良痛懲凶暴一切私派悉除之吏役無敢舞弊因公被
議去士民餞送多有涕泣者

邯鄲志稿

袁正林號墨村江夏進士道光十二年知邯鄲縣拆毀
淫祠建立義學修葺文廟城隍諸祠補築沁水隄在任
五年百廢具舉調清苑陞遵化知州

畿輔通志

韓象鼎章邯人道光丙申進士二十三年署邯鄲知縣
遇事剛果剖斷明決案無留牘民不被擾任未久去邑
人惜之

邯鄲志稿

謝子澄新都舉人道光二十七年知邯鄲縣值歲旱荒
歉力請上官開倉賑濟全活無算鄰境多盜聞警躬親

堵禦盜不入境課試書院與諸生談古今忠義事慷慨
激昂聞者悚惕調天津遇害事聞奉

旨歷任諸縣皆祀名宦

同上

趙庭椿山陰監生道光二年知成安縣闢田疇實倉廩
除疾苦清獄訟重修衙署移建倉廩自關帝廟文昌宮
及各祠宇以次興舉邑人至今稱之

查揆撰碑記

范梁錢塘人道光庚子進士授威縣知縣決獄如神愛
民若子除姦暴省刑役利弊所在罔不周知尤加意人
文捐廉課士雖窮僻亦知詩書後遷任去士民多攀轅
卧轍請祀名宦

縣冊

張學詩平定州舉人道光九年知清河縣溫厚和平好惡同民藹然有家人父子之誼時呼爲張青天

清河志

曹笏字定之南昌進士道光十七年知清河縣崇儒重道下車重修書院延請宿儒主講每課勤加訓誨一時

人文振興

畿輔通志
參清河志

伊鏗額滿洲進士道光二十年知清河縣崇學校自奉清儉決獄平允凡吏胥積弊除剔一空去之日囊無長物咸稱廉吏

清河志

戚貞字子固錢塘人道光庚子進士二十三年知清河縣年少有異才英明果決胥吏難欺禁娼賭除盜賊閭

閭綏靖夜不閉戶尤崇儒重道振作人文遷任去士民攀轅者甚衆

同上

佈彥泰正紅旗進士道光二十五年知清河縣廉明善折獄日坐堂皇訟至輒先詰之誣罔者立窮不待對質而曲直自分一時人心咸服政簡刑清

同上

石元善安徽監生道光二十八年知清河縣雅好詩古不染宦氣聽斷惟慎廉得其情則哀矜之勸諭百端民皆感悟有愷悌之風焉

同上

施溥字伯言厯城副貢道光初由三河縣遷知磁州政治嚴明以風教爲己在時貞婦高鳳夫南遊父爲里豪

誘逼女嫁構訟溥得其情以法繩里豪而勒還其聘寓書南海覓氏夫候補令楊耀祖楊遣僕迎鳳去謝函有云廿五年之約一飯關心六千里之書三生刻骨一時傳爲佳話

磁州志

楊樸字篠峯夏縣舉人道光十一年知磁州勤聽斷減差徭戶鮮追呼案無留牘嚴刑懲惡強暴潛踪役有因案索民錢者覺察立令追還人尤感悅碑頌達於四境

同上

恩符蒙古正白旗人道光二十七年知磁州明幹有爲果於任事舉節孝育人才一切經營皆以經術飭吏治

尤嚴於疾惡一時吏民畏服弊絕風清

同上

史策先字吟舟棗陽進士咸豐六年知廣平府性慈仁愛士尤切以環城水利歸入書院助生童膏火復擬濬壕以廣其惠旋因目疾去任多士思之

採訪冊

王啟曾字貽孫蓬萊人道光丙申進士咸豐九年權知廣平府性剛毅長於聽斷有刁生養無賴多人夜持利刃入人家劫少婦摘其罪竄之遠方城壕淤閉失修值歲饑啟曾籌萬金仿以工代賑法日督挑挖越三月工竣栽荷種蒲歲獲數百緡歸書院經費畿南寇起竄入郡境偵知隍深且廣乃遁去永年西鄙素獷悍不供徭

役縣尹遣役督催往往被拘留不得還啟曾會辦團練校藝於場故示團長曰某某村不法吾奉檄將捕之西鄙聞之懼介紳士乞恩願盡三日完宿逋許之遂納課如舊豫省告警擬辦團防有邯鄲幹役李自有者被訐縲絏來府廷察其才可任會有劇盜巢深山役莫之制乃試曰汝能擒以獻當赦爾罪破械縱之去自有入穴縛其魁並獲其從五六人遂授爲練長俾募勇丁備調遣嗣遷正定知府卓著政聲以道員擢補

畿輔通志

周憲曾字蔭之仁和舉人咸豐三年授廣平同知有政聲值髮逆竄臨洺關憲曾嬰城固守城陷死之妻蒯氏妾郭氏幕友何戴筐同遇害事聞奉

旨建專祠

畿輔通志

杜希軫字牧園隆平進士咸豐五年任廣平府教授品端學粹尤邃於理課士娓娓不倦諸生進謁必以道義相規及其門者皆守禮法

採訪冊

陳政典字章軒灌縣舉人道光中權知磁州勤於政治實心愛民嘗自爲息訟歌以勸之民皆感化咸豐二年知永年縣崇儒重道課士面加獎勸成就人才甚多粵逆北犯永邑震動城垣被水多傾圯急爲補築後洺關失陷賊訶知城固壕深不能近遁去

永年志參
磁州志

重修廣平府志 卷四十五
范守恆蒙化廳舉人咸豐中知曲周縣十一年東匪陷城禦賊力竭歿於南城下事聞奉

旨建專祠

畿輔通志

余承恩靈石監生成豐十一年權知曲周縣值東匪跳梁民心惶恐承恩不避危險身先士卒賊見旗幟輒驚遁戰功卓著屹然爲一方保障軍務肅清優禮士類整飭書院士民悅服紀政績勒之石尋擢廣平知府同聯俊旗人咸豐中知雞澤縣時馬貫莊武生馬文光等鳩衆倡亂陷害各鄉聯俊捐募民兵晝夜追勦四境稍安尋又飛蝗遍野人益惶恐復捐金收買設計撲滅在

任二年虧累甚鉅因被議去士論惜之

雞澤志稿

李鼎字象九祥符人道光庚戌進士咸豐四年知廣平縣廉介勤能循聲卓著尤加意造士多所成就值歲旱蝗鼎躬捕撲於炎天烈日之中吏民見而皆驚靡不盡力蝗遂滅有流寇百餘人詐稱范縣差過境鼎覺之往捕衆寡不敵賊遂入城庫獄衙署搶掠一空竟以是罷官士民惜焉

採訪冊

盧昌輔南康進士咸豐元年知邯鄲縣清廉仁愛嘗自外還署見窮民負柴集堂下詢知何例私派革之書院就圯捐俸重修以盜案去官民咸爲太息

畿輔通志參邯鄲志稿

盧運昌南昌舉人咸豐三年知邯鄲縣時髮逆竄擾土
匪乘機搶掠運昌戢奸除暴民賴以安會旱蝗歲大祲
設廠市蝗給錢代賑人咸德之

同上

沈溶字子泉太原人咸豐末知威縣十一年山東教匪
張善繼鹽梟宋景詩等作亂溶與同官治城守募勇數
千分段防禦賊擁至縱火攻城溶督兵力禦礮石齊下
賊立卻會大兵至合力擊之賊遁危城獲全

畿輔通志 尋

採訪冊

擢知府署廣平慈惠廉明甫逾月卸任去
黃安瀾江西舉人咸豐三年知清河縣明幹有胆略時
髮逆至臨清與清接壤清固無士卒城內百姓聞警悉

散安瀾閉門固守帶家僕數人執刃梭巡晝夜不寐軍
營來札索草豆各數萬因指其首日城空草豆刻難辦
訖祇有此耳差官愕然去

同上

徐承堯字思君浙江人咸豐七年知清河縣洞悉利弊
政尚嚴肅鋤奸戢暴盜賊屏跡民賴以安

同上

李昌祺雲南進士咸豐九年知清河縣精吏治有少年
某因訟株連被役逼索十餘日負飯債甚鉅父疑子浪
費送官究治訊得其情責役分還少年無累任未半載
解組歸囊空如洗士民多有供獻者去之日餞送遮道

同上

李承熙字亦白山西舉人咸豐十年知清河縣監生某被訟株連役因勒索不遂羈班房凌辱百端抑鬱不得伸承熙訊得惡狀卽時嚴繩以法奸書蠹吏爲之斂跡士民德焉同上

陳大烈灌縣監生咸豐十一年知清河縣莅任數月無滯獄無冤民卓著循聲東匪竄邑境城中震動大烈厲聲曰賊氛密邇勢恐難支願從我者捍禦不願從者早逃我有守土責誓與此城存亡率僕從數人竟夜梭巡賊訶知城內空陷之大烈罵賊不屈遂遇害事聞奉

旨建專祠

劉步嶺撰傳

王簡字岱峯滿洲廂白旗人咸豐四年知磁州爲治清勤日坐堂皇重門洞闢有赴訴及白事者立爲清理無少稽延因公赴鄉輕騎減從絕不擾累村民在任十餘年始終以廉潔著

磁州志

羅繼勳字仲卿山陰人咸豐八年任永年典史清介自守勤政愛民在任二十餘年凡修城濬壕疏沼河練團防辦平糶儲義穀諸要務皆實心經理勞怨不辭歷任郡守邑宰咸資臂助訟有屈抑者得其情必代爲剖白或酬以金帛卻弗受光緒十年春築隄修道力疾從公卒於官邑人至今思之

採訪冊

倪嘉璘常州人咸豐三年任曲周典史辛酉亂城失守

罵賊不屈賊磔殺之附祀范公守恆祠參曲周志

石鳳洲河南人咸豐初任雞澤典史至十一年卸事新

任黃恂江蘇人甫接篆教匪犯境城不能守鳳洲被執

死之恂公服坐獄門亦罵賊不屈被賊支解死事尤慘

畿輔通志

趙惟煥字蘭卿南豐人咸豐中任清河典史十一年捻

逆竄境惟煥督兵迎戰賊執之厲聲罵不絕口賊斷其

舌復噴血擊賊眾支解之畿輔通志 邑人楊一峯撰云惟煥咸豐二年任邑捕

廳每決一事立一政無不切中時務其精明強幹久載口碑辛酉四月七日賊撲縣城城中居民不滿百家聞

警星散士卒寥寥實難嬰守惟煥誓效死弗去城破邑令陳君大烈以罵賊不屈殉難惟煥偕叔德言妹丈黃

欽苑並帶家丁白貴等挺身接戰寡不敵眾遂同死事聞奉旨追贈州判兼給雲騎尉世襲罔替與陳

大烈並祀昭忠祠

婁鳳閣大名人前任廣平外委咸豐十一年肥鄉葫蘆

營教匪王大句連東匪陷廣平城焚燒倉庫衙署一空

鳳閣奉檄帶勇勦賊與戰於箔頭村北斬賊首王大餘

眾潰逃廣平克復百姓爭餽酒食犒軍採訪冊

祝塏字爽亭陝西安康人弱冠成進士出宰河南內鄉

柘城新鄉太康等縣遷光州牧擢歸德守興利除弊懲

奸弭變所至有聲同治元年直東會匪蜂起大順廣道

重修廣平府志 卷四十五
秦聚奎禦賊陣亡

朝命以塏代之兼權攝

欽差事務塏倉卒率舊部練勇赴任激厲民團次第克復廣平邯鄲各縣復捐款飭修廣平縣城事平後化民勵俗倡明正學月集士人於署講論道義朔望於通衢宣講

聖諭廣訓詳定鄉約數十條舉行三郡通飭二十七州縣振興

書院義學先後籌解廣郡清暉書院經費一千六百金

大名順德均增益之詳請學院立案杜地方官提用之弊次年巡

閱蒞廣傳集士民到府學明倫堂講學嘗謂欲弭禍亂在正人心欲正人心先興文教識者以爲得其要領漳

水數爲民患築長隄百里以障之教匪錢洛文結黨謀逆前任每姑容之塏至誘擒伏法馬三黑以團練爲名跋扈不法魚肉鄉閭與孫懷珍構釁塏帶勇往勦踏平其寨在任不及二年三郡士民頌聲載道旋因豫省任內征科事被議去士民上書請留後隨左相國宗棠督軍往來舊治百姓歡迎爭獻酒食不以客兵至而畏避之十一年復來署任興學禮士實心愛民一如其初塏夙研性命之學體諸躬行自少至厯官各任日書功過格未嘗少間故所蒞以身立教三郡士庶至今稱之

體微
齋集兼
採訪冊

楊毓相字樹屏邵陽拔貢咸豐中知肥鄉縣頻年荒旱
詳請緩征以蘇民困復遍歷鄉村問民疾苦給民籽種
又重修城樓移建魁閣造軍裝訓練勇捕蝗濬濠善政
甚多越境勦賊屢著奇績同治三年擢守廣平東匪不
靖戎馬倥偬毓相以郡城殘破倡捐重修士商慕義各
踴躍助工城垣一新民賴以無恐凡衙署書院漸次興
舉當時勵精爲治以毓相稱最

趙文瀛去思碑
記兼採訪冊

李朝儀字藻舟貴筑人道光二十五年進士同治四年
知廣平府性嚴正勤聽斷尤喜培養人才每課士親爲
評閱品題精當整頓秀沼書院使廢者復興七年冬夷

人強購民房判得直緣是去任士民焚香泣送數十里
不絕總督曾國藩薦舉賢良以朝儀爲首後歷官至順
天府尹勤政愛民始終一致有古循吏風

畿輔通志
兼採訪冊

長啟字子明滿洲鑲紅旗舉人同治八年知廣平府仁
慈和易不立厓岸與民休息修學宮建倉廩創設保嬰
牛痘局書院義塾尤殷殷注意焉前後在任十餘年去
後士多思之

採訪冊

王蘭廣字香圃修武拔貢同治十二年任廣平同知性
嚴明下車數月頑民蠹吏爲之斂跡培養人才每課士
論文說詩娓娓動聽鄰封士子聞風咸來惜未逾年而

卒靈輻去時紳民哭祭於路有送至境外者

同上

王玉相字石臣大城進士同治四年任府教授學問淵博善於訓迪因材施教俾高下皆中繩墨在任十餘年如一日士爲所成就者甚多

同上

王德炳字子範鹿邑進士同治二年知永年縣明斷有爲吏莫敢欺喜造就人才月課試士親與講論文藝視如子弟多士悅服七年冬夷人強購民宅邑人訟之德炳請於郡守籌資贖其地爲義學延師課貧家子後調任成安去之日送者遮道邑人思慕不忘設位祀之

永年志

王延桂諸城監生同治元年知曲周縣值兵燹後城市蕭條延桂修廢舉墜多所締造人心爲之一振

曲周志

吳朝彥字良輔許州人同治乙丑進士知廣平縣廉明勤慎實心愛民值歲大祲力請賑濟查戶口造冊籍嚴杜濫冒不假胥吏手與衆紳董躬往給散務使貧民得沾實惠全活甚衆今猶口碑載道

採訪冊

英榮滿洲正藍旗舉人同治二年知邯鄲縣甫下車賊突至逼城垣衆懼多逃散英榮獨守空城屹然不動賊不敢近賊去以城敝難守派民先濬濠復出廉金募工修城自叢臺礮臺門樓甕城以次興舉旣堅且固守禦

亦備後鹽梟擒匪復來肆擾難民入城者咸賴安全以
丁艱去十一年復任政聲尤振

崔華山修城
記兼採訪冊

楊昌江貴州天柱進士同治二年署成安縣時宋景詩
作亂昌江繕城垣捐鑄大礮噴筒登陴固守賊逼城知
有備引去士民獲安

畿輔
通志

溥福字筠橋廂黃旗人同治間知威縣廉潔自持愛民
如子在任前後十餘年修城工立書院建義倉捐廉倡
率設立條規善政多有可紀去任後士民爲樹碑以誌

遺愛

縣冊

徐沛然字雨亭善化監生同治四年署清河縣廉靜愛

民不縱吏役民被差押役每勒索金帛視貧富爲多寡
名曰扣鍋以是傾蕩家業者不知凡幾沛然察知其弊
每聽訟時先詢其被役索錢否得其實立逼役償嚴予
懲責吏役由是無敢作奸歲旱禱雨輒應人以爲撫字
心勞誠格神明百姓至今德之

清河
志

張敬大名人同治初任廣平外委值東匪逼城敬率團
勇百餘人出與賊戰殺多名賊少卻旣而賊衆麇集敬
度不能敵麾兵勇令各逃散已誓以身殉遂下馬負屋
隅獨與賊戰自辰至申氣不少衰當之者輒死後有賊
潛出其後登屋以亂瓦投之體無完膚遂遇害

同上

夏詒鈺字范卿江陰貢生光緒元年知永年縣廉能精細訊案剖決如流奸民猾吏不能施其詐續修縣志堵築洛河辦平糶儲義穀皆實心區畫首出巨資爲一邑倡在任七年勤政愛民始終不貳後卒於官人痛惜之

採訪冊

盛鴻字叔亭富陽舉人光緒十二年知曲周縣質直無僞實心行政邑差役恆逾數百人鴻至每班止留二三人餘悉遣散日坐堂皇訟者至卽召問隨斷隨發無不允當蠹役李某久爲地方患鴻聲其罪而置之法人心稱快尤好造士月課親爲校閱拔其尤者優加獎賞貧

寒之士不時賙恤在任三年禁戢盜賊裁革浮派禁種

罌粟濬城壕植柳株善政多有可紀去任後邑人爲立

德政碑

同上

黃汝香字孝卿平定州進士光緒七年知清河縣興利除弊實心愛民尤喜作養人才課士親爲衡校拔其尤者優以膏火續修縣志予奪增損一秉至公邑人至今思慕焉

同上

